



盧溪先生文集卷第七

古詩

遊貢游洞

竄身楚西極幽竒頗窮歷况此古道傍橫天竦蒼壁
何年始開鑿工如鬼鑿刻飛空數百丈突出清鯨額
那知風雨時雲雷非窟宅事跡墮渺茫探討失圖籍
豈無高世士於此煉金液不能久徘徊上馬空歎息

次韻折樞密題向萍鄉莞爾堂

器遠無近用弦歌只暫娛從來趙魏老或爲滕大夫
昔時武城宰其人骨已徂牛刀發新硎夫子輒驚吁

向侯本學道與世疑闊踈擁紉聽衙鼓庭下一事無
不爲赫赫名詭衆以自殊催科雖云拙於今乃賢歟
夫子儻無言黑白共一區家有治縣譜不飲常晏如
棠陰決民訟松間讀我書飛蝗避境土野鶴馴堦除
堂上盛賓客不減陳趙予新詩播京邑異世乃同途
振轡若登仙身輕衣六銖雲間候飛馭君焉何時迂

寄賀魏彥成郎中

扶桑日出天開關江南太守初賜環駕行舊班三尺
脚踏他龍尾回天顏是日奏對驚衆目錯國不動安
如山爲郎盡省非常調民曹金穀徒煩要江淮久鬱鬱

鳳姿一飛宜上青雲表政使垂紳坐廟堂南北封
疆談笑了君不見河南魏弱翁治行聲聞九天上漢
室中興拜丞相

謝魏彥成知郡寄惠漂布

江南渡頭浣紗女年年舟上織白苧織成還自漂江
沙女手纖纖白於布水邊時有釣漁人何異淮陰漂
輕絮一飯能識韓將軍不負平生名漂母州西寒士
衣百結太守憐渠茅



作練衣倒接籬炎官火

傘方張設恨無青絲白玉鞭醉騎白馬踏江月誰知
南國任公子留待深冬禦霜雪

昔徐仲車爲山陽教
官太守程公見其衣

幣以新衣易之仲車因思古齊任昉之子冬衣
絺綌遂用其事作詩以謝惡布亦暑服比絺綌
尤精奇故
復用之

題向宣卿伊山有裕堂

伊山連屬朱陵村公來力掃衡山雲便令築堂隱其
下萬竹遶堂松作門此公文簡四葉孫奇謀遠略世
所聞胸中磊砢著千古雲夢豈止八九吞憶昔荆湖
盜初起乞得兩郡西南奔至今衡陽道州政父老出
涕猶能言負材傑異衆所忌使者不便仍謗誼宗閔
羞作南山虎李斯却憶東門兔壁後置人誰不知傾
身障麓情已具何曾日食一萬錢猶言舉案無下箸

貪嗔俱是可憐人百憂纏身誰得汝請君聽我伊山
行九疑洞庭皆可耕清風不用一錢買時有明月窺
簷楹其中廣莫幾萬里寵辱微物安能驚自非胸懷
有本趣其氣激烈何由平安得中郎捋鬚手喚起桓
伊來撫箏桓伊嘗居此山亦嘗與謝安
有功而遭謗故用撫箏事

題劉知縣後隆堂

五季列壤爭未休庸兒崛起操鉏耰朝爲吳臣暮歸
楚黥髡盜賊更據州君家大傳出奇策氣壓百萬姦
夫謀一朝談笑解紛亂辭爵却歸東海頭自言其後
必隆盛慶源遠與江河流昔時楊寶所活一黃雀猶

能四葉清德傳至彪又聞何敞陰功唯治獄天遣使
者賜策何其優有如大傳安堵十萬戶宜令後世衮
衮生公侯

贈別劉文卿楚公之孫

丞相諸孫早相見子獨羈遊未識面忽騎瘦馬夜敲
門始得此郎如小阮通都大邑多豪英乃走窮山訪
微賤忽忽未暇世論文會看落筆知關鍵

題王主簿逸老堂

人生異趣各有托年少何如老人樂老來萬事不掛
眼樂處勿憂兒輩覺疾雷破山吾不驚亦賴天教閑
處著兩部池蛙當鼓吹萬疊雲山作屏幕此時真是
地行仙拍酒何須萬斛船不愛白日昇青天不愛腰
纏十萬錢但愛百年三萬六千日日對芳罇聊自逸
明日花開花更好定知不向愁中老

題羅氏餘慶堂

蒼崖翠壁前人居猶識當時屋上烏應念前人餘澤
在飛閣突出青山隅山前老父相叫呼為起里門高
著櫨葱葱瑞氣已充閭他日要容高蓋車

送劉熙載赴省試

江南山欲窮地與荆楚錯君生於其間秀氣鬱磅礴

文章變骯髒聲名久洵皓至於吐言談風味亦不惡
如何生寒窘詩書對藜藿天網羅英材搜獵徧叢薄
君材萬人敵百鳥避一鶚忽從布袖中盈編出新作
竒怪驚我前雷電雜風雹行當試殿陛宏文要追琢
同遊三數公詞藝俱瞻博上方集多士謀欲取京洛
徑須陳治安端不談冗齷致身青雲上去天纔一握
早寄山中人庶以慰寂寞

贈劉亞稷

君家大父當元祐賦壓鄉閭在人口子今二十能綴
文已觀落筆蛟蛇走藍田出玉果不非豈知剖蚌得
珠璣乃翁高材卧林壑眼中有此光陸離炯然見子
侍公側鵷鷺翠倚碧梧枝嘗聞鵷鷺之生破卵出五
色即欲摩天飛陸機少年作文賦河東小鳳才亦竒
自古有英物秀發皆如斯我謂鵷鷺排風整毛質翦
拂始光輝尚須琢琅玕之實飲瑤海之池然後巢阿
閣集赤墀赤墀阿閣無凡棲期子當呼鳳來歸

謁王宣子舍人

垂旒畫袞雲繡裳天子擇日開明光臨軒策士必親
覽鴻文獨高翰墨場都人爭看狀元出九衢車馬何
煌煌貴名一日動天地破卵插翼飛鸞鳳螭頭獻納

近日月謂公遠器宜廟堂麟符虎節下霄漢雙旗忽
開南斗傍朝廷已知弱翁治行且大用歸巖廊江邊
野老病初起始欲杖策窺門墻

張元暉生日 三月十六日

春風吹月昨夜圓門對新生洲渚邊紫文鸞鷲初入
夢燕公手筆大如椽赤松黃石俱長年金鉤鵲印仍
家傳劔池霹靂蛟龍吼寶氣飛精射牛斗人呼張鎬
帝王師相公元是山中叟

和王宰早梅

雪裏花開冰未折如見瑤姬侍君側瑤姬國艷欲傾
人嫣然一笑頰齒白踈影橫斜語最奇桃李凡姿無
此格瀛上休觀倒暈眉且看嬌黃塗半額

贈歐陽伯威

歐子扶親喪崎嶇度湘巘豈無當塗人孰肯爲封傳
跣足行萬里僅能及鄉縣埋玉謀荒山此計墮瀟漫
世無郭元振一舉四十萬積微會衆力庶可咄嗟辯

送頗姪郡學讀書

郡侯勤勸駕英聲播江濱學官得鴻儒筆頭弩千鈞
金蘭二三友執經造其門歐陽子劉子試藝咸有聞
吾有奮袂起去若渴驥奔妙推天地假高談帝王尊

入室得妙語錄寄青溪村

還劉秀才文卷

君家邇來妙人物叔父風流更超絕中興天子搜羣
材龍虎同年收竭末我識君家鐵面公當年作賦聲
摩空君今祖襲乃復爾自出機杼或家風惠我新編
盈大軸武庫五兵森在目縱橫璀璨不知名玄圃崑
山皆積玉文章磨治欲無瑕要如春風開百花筆端
著刀覷天巧自我發成嘉葩

和通判周監丞見贈

大廈久撞壞撐拄非一支安得好柱石壯麗如昔時
向來榮盛處草木今紛蕤羣材未盡出去若馬脫羈
韁斯期朝無人過之輒欲私骨相不媚媼因歸結茅茨
忽逢高軒過飄然鸞鳳姿宜在帝左右珥筆班龍墀
少年歷清貫高名誰不知胡爲至下邑撫俗問民疵
題詩滿巖谷妙處有餘師

盧溪先生文集卷第七

盧溪先生文集卷第八

古詩

和趙叔清蠟梅

春入梅花村蠟粧林影繁香肌冒寒立此意爲誰存
官額半塗黃要爲出俗韻不露水雪姿風流真素蘊
江亭候施倅醇翁阻水漲作詩寄之

夜雨漲溪碧天明望歸舟飛帆出木杪浩蕩兀中流
洪崖仙人姿謂落滄海遊興盡却回棹待此霖潦收
抱琴出竹迎倒披翠雲裘風濤正可久煙波生暮愁

施育吾得道於
洪崖公其裔也

聞郡中請賢老住報恩作詩贊之

夜郎佛刹接西土誰敢招提境中住老賢元是住山人拄杖無心自來去山中猿鶴不須驚明朝聽打禾山鼓鼓聲新響振人天水禽草木咸歌舞

贈羅道人

余昔遊湖南聞羅道人而未識也忽相遇于螺浦之西鬚髯如畫神鋒甚偉又出時賢所贈詩益知其有以異於人也亦作一首贈之

道人渴飲石縫漿鬚髯墨黑兩頰光或云公是伯休那又疑楚有接輿狂倒騎白鹿渡湘水獨識老翁跳玉堂他年賣藥長安市乞我仙人不死方

贈蜀僧無觀

蜀僧無觀善相自謂未能遍閱天下士意江海山林之間必有異人行當訪之於其別也贈之以詩

師出峨眉西極天萬里一衲雙行纏朝遊名山暮滄海不著脚踏諸方禪眼中自有識人物行盡江南山水窟紫雲深處有神仙高馬達官無此骨溪頭惜別強吟我顧我無才奈若何他日長安逢李白爲乞峨眉山月歌

次韻胡邦衡衡陽縣瑞竹堂

墻裏圍脩竹竹間開草堂經春多夜雨入夏長新篁
節抱幽人操風敲明月璫孤根元獨立並幹兩爭長
影落龍蛇動清移枕簟涼門常對衡岳氣足傲羲皇
日射玲瓏色林踈瑣碎光雙莖非別種異物出時方
海嶠名雖久湖海跡愈彰行當卧龍起天爲見珍祥

和胡觀惠詩兼致守倅招延之意

伊昔橋門盛環觀壁水春一鳴先折桂百拙誤謀身
憔悴湘江西淹留京洛塵思歸綠竹鶴靜念愧朝紳
顧我蓬蒿賤逢君海岱珍贈言多溢美秀氣發清淳
本出東臯裔元非水北人山靈回俗駕幕府盛談賓
駿骨千金重沙鷗萬里馴人生各有趣忍負接籬巾

和施倅歲暮感懷

野闊生愁興時危無定居淵明傷倦鳥張翰憶鱸魚
宦路風波惡交情勢利踈謀生成齟齬欲進復躊躇
盜賊猶猖蹶田園未墾鋤君王圖治切新下急賢書

近有詔
求直言

和歐陽廣明竹間桃花

雨罷新花明曉日竹陰瑣碎錯黃金墻頭過盡雙飛
蝶葉底巧啼何處禽玉女洗粧勻淺淡老龍脫箠著

青深柔姿敢並高標立直節時容粉面侵愛客分明
莫來折坐輿徑造不妨尋桃花落後春事已唯有清
風滿竹林

盧先生文集卷第八

盧溪先生文集卷第九

律詩 五言

秋郊曉興

玉露三秋夜銀河八月涼山虛響相答江靜練浮光
雨足園蔬茂年豐稻穗長不憂羣雀噪鳴鳳在朝陽
送謝夢叟昆仲之湘江

蠟屐訪窮巷脂車戴曉星哦詩添此語望岳插清冥
烽火連蠻徼樓船壯洞庭瀟湘多夜雨羨爾對牀聽
秋夜周子康登辰州城樓

殘夜不能寐起登城上樓山銜半江月風撼九天秋

鵲已棲高柳人猶棹小舟誰云羣動息漁子正垂鈎
清江留別任子嚴 正月過此甚遽不果
尋訪及歸又以鄉人相逐者衆不肯泊舟輒
留數字寄別庶子嚴知我過此耳

正月下南昌扁舟過玉梁逢人問任子迷路失仙鄉
吾道今如此斯文恐未亡烏臺千載話他日自輝光
送客

東門楊柳陌車騎散林垆草綠古今道馬嘶長短亭
人歸天北闕光動斗南星送客何年了春頻又滿汀
次韻方性夫同年見寄

憶在長安日先朝始賜官同登進士第半著侍臣冠
歸意倦飛鳥詞源倒急灘平生事何限話着齒牙寒
用朱希真韻寄葛主簿時權丞新縣丞

聞道石壕吏今猶夜捉人徒煩移簿領何計靜煙塵
痛哭聲連野椎敲瘡滿身追科君正拙寧不動悲辛
再和一篇兼寄朱希真

主簿四海士先生千載人羈遊厭旗鼓談笑出風塵
高卧屢違旨希真累徵不赴榮名忽中身清詩何絕妙壑曰
識餘辛

溪上春日

遲日千花艷開簾雙燕飛好山晴
遠水靜含暉
細草爭青出佳人薄暮歸此時春思亂未覺向來非
送樂秀才歸新淦

夜雨漲新碧曉舟搖古堤帆從金水落家在日梁西
萬竹遶茅屋千峯隔釣谿探囊能起死門外想成蹊
樂善醫

春日遊鵠湖山

風起羣木禾花開兩壁香山溪雲影變人靜鳥聲長
紺殿橫崖起飛泉噴玉光扣門僧出定彈指下禪牀
鳳停館中秋

山高月未吐吟上嶺頭看萬里雲霄靜一天星斗寒
蝦蟆出金背玉兔動銀盤唯有南飛鵲遶枝終不安
和葛德濟見懷

憤氣蟠胸久開談音吐鴻雲山初闊別罇酒憶相逢
暮草黏僧屐晴江理釣蓬閑居詩句僻祇自詠家風
送妙空大師往郴陽省兄

遠水縈環碧秋山作劍攢取經行嶺傲飛錫下雲端
風捲湖煙靜天高鴈影寒何時却回首却爲掃蒲團
宿唐興寺夜雨

木落羣鳥起孤眠枕未安客愁金粟盡酒病玉壺乾

鴈過風傳響雞鳴雨送寒平生萬感集咄咄出毫端

和周監丞聞京洛關中收復四首

扈聖尊皇極真人握赤符梯航初入貢輿地夜披圖
力戰非天意賡歌奉睿謨花卿雖猛將絕世可能無

又

戰甲初休馬邊烽不舉狼山河秦地壯日月漢天長
劔戟將銷盡鉤鋤始破荒欲觀調鼎手一變已堪嘗

又

喜有官中信衣冠返舊京交馳節髦使悉罷羽林兵
丹詔從天落羣心仰首迎蕭條萬里道今日有人行

又

河南新郡縣吾宋舊山川喬木應猶在遺民不記年
行人將漢月持節照胡天屬國今無恙遙知免齧氊

送劉禹錫之官五羊

南海千山外東風幾驛催嶺頭梅雨歇旗尾瘴煙開
蠻徼無塵起中原有使來時應問消息會向日邊回

秋夜

山色釀空碧砧聲鳴翠微自憐爲逐客誰爲擣寒衣
居士本無病叅軍胡不歸扁舟在吾手爾莫用危機

曉行唐興寺道中寄劉美中

雨洗空色靜雲開曉碧初峯巒爭峭拔臺殿已清虛
村落孤煙起人家半嶺居回看巖際寺幾欲倒騎驢

清軒

竹逕有佳色耳根無市聲山如畫屏立水作縠文生
窓戶松風響園蔬杞菊馨夜深天更靜待看玉蟾明

亂後過東山寺

煙塵苦未盡紺殿倚巖阿雲護佛世界山栖老禪和
斯人具眼目法力辟兵戈歆枕聽粥鼓誰能柰爾何
和黃子餘湖南道中寄弟子默二首

花落黃陵廟禽聲隔岸聞山川湖外遠牛斗地形分

回趁峯頭鴈遙瞻嶺上雲惠連詩更好夢裏亦思君

又

卷裏詩新出關中記舊聞乾坤今轉大吳楚昔嘗分
霧失朱陵峒晴開紫蓋雲仍傳九疑尉竒策動明君

時方傳鄉人營道尉董體仁作殿魁

又和酬子餘

句法出脩水家聲誰不聞微言雖甚秘殘復可能分
筆掃堂堂陣詞飛藹藹雲馬卿才思逸傾動卓文君

又和酬子默

半渚西江夜新聲月下聞定知終夕詠不覺曉光分

儻有罇中酒重論日暮雲山林正憔悴抵掌忽逢君
頗姪明碧軒

不可居無竹開軒眼界新風搖碧玉玦雨解籜龍鱗
晚色侵書帙踈枝掛月輪客來從逕造莫問打門人
和李巽伯送劉德基赴縣齋

令君湖海士置榻謂公賢綠野千峯翠朱甍萬室連
客依彭澤柳人問孝廉船他日功名逼金魚未免懸
郡燕新進士胡文侍讀即席賦詩因次其韻
鴈塔題名處蟾宮折桂新英雄綴行列材業濟生民
榮耀初開宴招呼如此賓鵬飛上霄漢橫海脫凡鱗

郭教授南窓置酒觀競渡次坐客劉時舉韻
一飲徑一石此風誰敢陪謂劉也日移林影轉船劈浪
紋開銀燭自相映玉山何用推廣文官獨冷賴有酒
盈杯

再次前韻

殊方作異客勝日喜遊陪鼓譟風雷動帆爭錦繡開
詩元無格律誰與定敲推折得新荷葉聊將當酒杯

送郭教授代人

蠻域經年住飄然見古風新編文似錦高論氣如虹
杖屨容追步箴規有發蒙方期親警效吾道又將東

盧溪先生文集卷第九

盧溪先生文集卷第十

律詩 五言

廬山道中寄送聶名世

村遠孤煙起山明曉霧開
人行萬松裏路過九江來
此去日千里其如腸九回
淮南酒樓近玉笛不勝哀
次韻楊廷秀臨安小樓不寐之什

坐待銀蟾上寒禁酒力加
霜清羣動息鴈過幾行斜
樓角猶吹笛天街又走車
客眠終未穩人語已爭譁
次韻李巽伯贈琴僧惠端

老端高世士聶李仙中人
鳳吐千篇久新吟十弄新

妙談天地假笑破海山春物物消磨盡今年始是貧
野外春日

步屨穿花徑香風吹客衣地偏窮谷暖雨過亂鶯飛
草色連空闊僧居入翠微田翁泥人飲數肘不容歸
送向主簿

捩馬志萬里棘鸞繞一飛薦書聞帝里綵服過庭闈
野渡生春草林花弄晚暉君家芸閣老應問我何歸
題劉元弼遠菴

門徑臨官路耳根無市聲山從雲外起風入坐中清
靜趣逸天半孤吟待月生緬懷江海意溪水遶菴鳴

辰州上元

留滯沅湘浦飄如雲水僧來爲萬里客又看一年燈
翠幃褰珠箔高樓俯玉繩鰲山今夜月應上最高層
用前韻酬清首座

寺寄他鄉客家居何處僧一盂鐘後飯數盞夜深燈
出井初無索斲輪還中繩擬心觀此境階級已成層
早春遊孔志行園

小圃傍城郭新堂磨碧甌青楓未鑽火高柳已參天
好鳥又相語幽葩自在妍敲門特逕造不問主人賢
春日携頓子同劉養正教授遊淨國寺至李

家園

野外煙光闊僧園竹逕通柳絲搖嫩綠桃雨落輕紅
處處花如舊年年人不同自矜雙足健著屐試春風
清明日訪胡師顏記是日所見

門巷倚城郭林亭占水雲竹搖碧玉玦池皺綠羅紋
鸞舌初調曲蘭芽忽吐芬牡丹雖晚發風味獨超羣
入辰州界道中用頓子韻

路入荒溪惡波穿亂石跳騎驢行木杪避水轉山腰
倒掛猿當道橫過竹渡橋吾生本如寄歲晚尚飄颻

憶馨鴻二孫

余竄夜郎日二孫纔三四

歲阿馨已誦得數部書兼寄書紙來阿鴻尚
幼余甚念之作憶馨鴻詩寄令誦之

憶汝何時見愁眉此日舒別來三換歲請得幾多書
字稍堪拈出翁今喜有餘阿鴻纔弄筆相對想軒渠
題步雲軒

身在飛煙裏如登霄漢行雲從脚下起雷忽耳邊鳴
暮碧佳人遠春紅晚照明能消幾量屐當不負平生
題昭昭閣

天意豈難訴雲煙眇降真倚欄瞻日月滿壁繪星辰
夜梵光生戶晨炊竈見神高門有陰德當不誤儒身

和余教授

詞高雲鶴筆掃陣堂堂妙絕江南社清新樂府章
窮通元自樂身世兩相忘不下千尋海焉能得夜光

和胡觀光聞蟬

地僻林逾靜山幽鳥不驚日高簾影重蟬噪柳陰輕
鬢學風前翼琴傳葉下聲士龍能作賦爲爾特留情

琴曲有葉下聞蟬
陸士龍作寒蟬賦

送李彥明

彥明欲赴大學補試因省叔

父吏部吏部余之故人作詩送之兼寄吏部
叔父今誰貴中郎一世豪渡江人物盛容駟里門高

冠蓋榮吾黨芝蘭見汝曹茲遊兼問學鼓篋莫辭勞

江上

倚杖江風起呼船水面開入從州背渡帆破浪頭來
月色共千里天恩徧九垓當年送客處待看赤車回

送楊彥昭往湖南謁陳夢肇運使

結客少年日同遊碧水邊今持繡衣斧就覓孝廉船
湖闊驚千里雲開有一天莫嗟清絕地不異泛紅蓮

謫辰州

得失真何事文章妙入場隱身三十載汗簡幾千張
名落江湖外氣干牛斗傍吾衰任飄泊朝夕渡沅湘

沅江上晚晴用頓子韻

急雨梢溪面
一棹轉渡頭
寒鴉栖古木
晚日射危樓
山帶黔巫遠
水還荆漢流
晴天思無限
細細數沙鷗

次韻周秀實通判送段季裕還永新二首

竹下忘年友
誰如藉與戎
相從知理窟
會見立奇功
兩地風煙接
三吳水石窮
飄蓬歲事晚
何日一罇同

又

州里聞名舊江湖
識面新讀書
元自喜擬古
欲誰倫
巖穴人歸隱
池塘草又春
周侯有佳句
持贈可娛親
惜春亭席上和伍孺安
醉醪

滿眼傷春色
瑤花墮玉卮
羣仙下來看
皎月自相隨
國艷晚尤貴
天香發每遲
我方留客醉
簾捲未教垂
同施倅遊壽昌觀

岸曲穿叢篠
山回轉翠屏
煙雲搖晚霽
樓殿倚空青
栢黛參天峻
松脂入地靈
幽尋未能及
重約扣巖扃
贈惠門端師
亂後過連嶺
閭井皆空唯

惠門寺歸然獨存書贈端師

劫火焦鄉邑
煙塵何處逃
雲藏佛世界
門背古亭臯
徑隱花木靜
山深人物高
老師具眼目
法力辟兵刀

齊雲閣

縹緲虛無裏嵯峨碧繞穹雲從斷山起樓在半天中
暮碧千峯雨涼生四面風更臨風雨上待看出豐隆

清音亭

亭枕秋山窟山明水共清空林生逸響飛溜落寒泓
誰識高深意初無世俗情何當携韻磬瀉此澹無聲

次韻伍孺安賦草堂瑞香

草屋簾垂地移花共宴遊艷姬香入骨熏炷錦幃頭
絕世方名立殘霞暮不收夜深燈影亂猶

水亭

新暑池亭上竹風吹我衣殘花經眼盡好鳥傍簷飛

水面澄陰閣橘林香氣微儻容携茗具來此避炎威

遺經閣

殖財作爭府教子乃義方斗起千尋閣中歲萬丈光
諸郎一受業丹桂幾回芳他日石渠論斯文想未亡

盧溪先生文集卷第十

盧溪先生文集卷第十一

律詩七言

寄黃平國正字

麟閣岩堯入紫清官居真是上蓬瀛玉壺風采想如
舊金馬文章元有聲近喜邊頭新奏捷獨憐江外正
拏兵老夫飽飯無他慮料理敲推怠未成

陪周秀實通判遊歐陽炳文園晚過隆慶寺

契真亭

別駕前驅朱兩輪後車藍縷載窮賓開門叵復見此
客看竹何須問主人坐久風雲欲回薄雨餘鐘磬忽

清新隔牆便是城西寺應有高僧住契真

和李巽伯少卿見懷

眼高四海意何如敢謂論文到闊踈春草夢池方得
句夜霜置酒復懷予初披郇國五雲字何啻劉公一
紙書銅鼓遇時思發響蜀樵須待刻桐魚

次韻徐漕按部至廬陵見訪

節擁朱輪下九霄因從物外訪英豪江南正自賢徐
穉天子先應問伏滔試看翰林批鳳尾何如大尉飲
羊羔諸公拔劍論功業當念蕭侯轉粟勞

寄程子山舍人

老泉仙翁騎列星文采風流屬此甥鳳閣初傳舍人
樣帝城新有能詩聲青萍出匣蛟兕吼赤手捕蛇狐
兔驚願扣洪鐘識音響暮年聊欲聽鑑鑄

過劉美中新居

亂碧峯頭水拍堤白沙寒竹淨柴扉晨光破霧千山
出絕壁盤雲一鴈飛窓外煙霞舒錦綺坐中談笑落
珠璣江邊野老逢人說待看追烽入翠微

陪元勃舍人秀實監丞遊徹見閣

薰風拂曉度長堤堤上雙紅捲使旗樓影與天俱在
水岸沙經雨不成泥他州半落青山外別浦遙分翠

浪低渡口神螺誰復識江空應只月明知

登滕王閣二首

翼軫南邊第一州滕王高閣枕江流天提日月東南
走地闢山川晝夜浮午後朱簾捲斜照更深白水自
明樓當時帝子鳴鑿後歌舞重翻又幾秋

滕王歌舞今千載髣髴鳴鑿度綺窓尚有殘霞伴孤
鶯時聞晚唱下長瀧危欄傑棟臨無地翠嶺層陰落
半紅欲詠朱簾捲山雨含毫自覺寸心降

贈黃伯成

痛飲長齋擬八仙醉中談辯亦逃禪吟詩不落正始
後作句定居靈運前富貴逼人應未免文章驚世始
堪傳近聞相國頻搜訪應有除書上九天

寄賀劉美中舍人直學士院

明光清曉玉開關脚踏金鑿近侍班行盡九重天上
路正臨方丈海中仙紫薇閣對青霄近紅藥花翻白
日閑待看飛龍催賜馬錦袍蓮燭夜深還

出城北由山徑入徹源忽逢荷花彌望不知
爲何處詢其地名曰長塘又行數里行大路

出連嶺作詩記之

山根細路逶長塘忽有荷花照水光誤入孤村看青

壁却逢千蓋擁紅粧採蓮不見溪中女緩轡徒牽馬上郎行傍綠堤將過盡回鞭小住惜餘香

長沙試殿聞傳彥濟永州考試還先寄此詩

永叔出試院詩有云入簾蝴蝶報家人

歸馬鏘然響轡環道傍春色正爛斑吟登回鴈峯頭月覽遍清湘雨後山剩有虹蜺蟠筆下喜聞蝴蝶入簾間花時獨鎖深深院卧聽笙簫響裏還

再次前韻

湘水清如碧玉環湘妃淚染竹痕斑此時遊宦非高志何日抱琴歸故山鴈塔共題雙闕際馬蹄同下五雲間今朝顛顛荆湖外却望煙霄嘆未還

春日山行

緩鞚青絲馬不嘶春山草長靜柴扉迸林新筍斑斑出隔水幽禽款款飛雨過泉聲鳴嶺背日長花氣撲人衣雲藏遠岫茶煙起知有僧居在翠薇

正月二十立春觀雪次韻向文剛

雪擁東皇下紫虛霓旌鳳馭肅前驅天將平地開銀闕人似春冰在玉壺綠蟻飄香浮翠筍青絲傳菜出行厨老農慣識豐年兆正欠漁簑入畫圖

再次前韻二首

馬上吟詩雪滿鬚，垂鞭信馬不須驅。病餘消渴澆茶
枕，醉後狂歌打唾壺。坐見詞鋒武庫還，如禁巒出
天厨。筆間能作有聲畫，似看輞川摩詰圖。

天公剪水落空虛，似借東風煖力驅。未用春禽催脫
袴，寧聞沽酒勸提壺。歌樓人唱郢中曲，野寺煙生香
積厨。何必萬錢方辦酒，一杯隨分豈難圖。

避亂深山蒙兄寶君寄牡丹數枝，鮮妍不減
平日。始覺茅簷頓有春色，感歎之餘，因成拙句。

鄉井彫殘屋瓦頽，東風依舊上池臺。別來縱值時方
亂，春到何曾花不開。覺茅簷堆錦繡，未消翠藪走
塵埃。勿云去草草無惡，今日遮藏要草萊。

再過東岡

物色江寒楓葉凋，江邊微雨暮蕭蕭。白沙翠竹舊行
路，碧水朱欄新渡橋。盡室當時避征戰，十年閑事付
漁樵。如今傑屋明人眼，一笑端能覆酒瓢。

送元上人遊仰山歸泐潭

兩刹峻嶒隱翠岑，却擔拄杖出煙林。來時飽喫東禪
飯，歸去泥添古佛金。絕嶺松篁青玉瘦，上方魚鼓白
雲深。是中不可著言句，且聽半山鸞鳳音。

次韻歐陽叔向水中月

月從海底轉天心影落長江海共深倒卓玉輪窺白
兔平看波面擁黃金魄隨秋水流無盡光射寒潭曉
未沉此月已曾經照古又觀古月照如今

次韻周子發喜雨

天邊旱魃凌高秋草木焦卷生百憂正欲焚山泣魑
魅忽驚暴雨交田疇牲羞奔走羣祀喜雷公怒叱萬
鬼囚何當盡洗炎熱苦坐令清風還九州

和胡觀光登酒樓

李白天夜登孫楚樓樓中翫月苦淹留定知公等非凡
客要是人間第一流玉勒穿花回曲徑銀槽瀉酒注
深甌遙觀翠幕張燈處小婦鳴箏生上頭

和趙叔清書事

鐵馬初休淮上兵人心遙望泰階平祥雲密遶皇居
近喜氣先從日下生漢殿風高飛燕雀胡天星亂落
欃槍從今且覓耳邊靜半夜不聞鼙鼓聲

和陳相之至日即事二首

湖海元龍氣宛然求田問舍語何緣兩京夢斷無消
息萬里人歸有歲年嶺外梅花愁欲破雲安江水遠
堪憐茲辰不預朝闈闔猶喜山間穩晝眠

南雪常時不到地嶺梅今與雲鬢綠漸添化國舒長

日更卜祥雲大有年萬木寒癡猶自凍一枝踈瘦想
堪憐時聽野老談新政坐竦詩肩夜不眠

新學

落成釋奠諸生畢集喜而有作

洗盡西江戰伐塵忽開黌宇照城闈一時人物風雲
會千里溪山俎豆新儻使將軍皆遣子定知夷狄却
來賓循文偃武須今日鳴玉鏘金未乏人

和歐陽周弼

誰念楊雄寂寞居忽逢佳士倒衣裾裁詩禿盡千毫
兔岸憤斜欹半幅練節並松筠霜雪後唾成珠玉笑
談餘窮山避寇應愁絕付與騷人萬古吁

別葛德裕主簿

官冷身閒簿領稀時從物外赴襟期憑君少緩青絲
鞵爲我聊傾碧玉卮野寺石泉秋煮茗松窓雪屋夜
論詩懸知別後東風近先寄寒梅第一枝

和葛德裕別後用舊韻見寄

阿吉德裕子也

渝川咫尺如千里千里猶堪雞黍期旋滴銀槽將進
酒細傾金屈倒垂卮間爲洛下諸生詠突過黃初數
子詩阿吉想能騎竹馬鳳雛低映碧梧枝

送裴主簿

長江歸去又騎驢依舊青山霜葉枯入眼雲山有佳

句脫身搖楚亦良圖輕裝但載書千卷後夜相思天
一隅乍喜飛鸞離枳棘莫貪爲縣落雙鳧

和居東村作

山中有西
泉寺故基

避地東村深幾許青山窟裏起炊煙敢嫌茅屋絕低
小淨掃土牀堪醉眠鳥不住啼天更靜花多晚發地
應偏遙看翠竹娟娟好猶隔西泉數暖田

送鄒去非

去非自清江來求書往柳陽

會貢籍明年當赴省試余宣和庚子歲作柳
州考試官去非時爲榜首今二十一年身
歎之餘作詩爲別

柳陽叨預校羣英二十年來一夢驚往日下帷搜俊
異見君落筆已縱橫才高固可萬人敵志大欲圖千
佛名誰念先生今老矣披簑倚杖看岩耕

次韻向文剛晁叔易遊青原

佛屋深蟠七祖山魯公竒字刻孱顏能來把釣溪臺
上安用賦詩戎馬間薄宦不知何處好浮生纔得此
時間夕陽渡口人爭渡又趁城頭暮鼓還

安成再逢黃平國

憶昨相逢氣益明投書力詆漢公卿一時末俗無高
論千古佳名屬後生魏郡初微狄仁傑汝陽幾縛李

元平行當獻納麒麟殿看挽天河洗甲兵

盧溪先生文集卷第十一

盧溪先生文集卷第十二

律詩七言

題郭秀才釣亭

野闊江寒一鴈飛
碧蘆花老鱖魚肥
遶欄綠水秋初淨
滿棹白蘋人未歸
醉任狂風揭茅屋
卧聽殘雪打蓑衣
他年欲訪沙頭路
會自携竿扣竹扉

次韻江正邦

盧溪春水欲平堤
滿徑蓬蒿竹掩扉
齋館靜無塵土雜
盤飧喜有藥苗肥
君尋甘露峯前住
人似山陰雪夜歸
江海未應終寂寞
鶴書將下釣璜磯

正邦聞王師來駐辭歸禾山次韻以別

時傳發兵駐吉州

潘才如海渺無堤肯顧衡茅竹裏扉閑釣一溪春水
綠尚容三寸白魚肥忽傳銅虎天邊下共探驪珠夜
半歸此去煙塵猶未靜何時馬跡破苔磯

和謝倅謁縣學

玉帳高談已厭兵聊將小隊出郊坰先生文史三冬
足學士銅錢萬選青他日却登龍尾道教人頂戴佛
名經諸儒勉稱興賢意作賦摩空動漢庭

和周公予遊春用前韻

曉堤春浪拍江城出郭試尋堤上坰雲脚忽從平地
起柳梢先入半天青村深漸覺人煙好地僻苦無車
馬經日暮歸來微雨歇酒醒客去月當庭

酬張公敏示古戰場賦公嘗繳納文今再赴試

弔古高文說戰場毫端凜凜挾秋霜自能突過今人
作不必汗為梵冊歲曾捲笏袍還聖主重携筆札試
明光曲江故有家聲在莫擬愁詩似景陽

和李彥文名獻民嘗撰芸齋廣錄行于世

偶從山澤得追陪吐論風生不受埃曾讀芸齋編廣
錄固知天下有奇才愁堆青簡千年蠹忙過黃槐花

幾番往歲聞名未相識常如弱水隔蓬萊

送李成叔歸峽江兼簡蕭懋德成叔先之子

平生未見嵇中散野鶴軒昂識季昆江表今無耆舊
在中郎尚有典刑存螺川汗炙書千卷玉澗船歸酒
一罇獨羨冰清蕭處士通家能入李膺門

次韻裴主簿述懷

著書尚有銀管筆騎馬元無金絡頭陶令種田非左
計漫郎作官真薄遊脫身簿領歸來好入手漁竿隱
去休老瓦盆邊可呼客興酣何用玉爲甌

謝直夫乘小舟訪予于橫山堂兼惠佳篇奉

次元韻

謝公雅量含丘壑夙有江湖萬里情迺肯屈身登野
艇更容著帽進書生詩成絕壁煙霞動雨過晚雲樓
閣明句法誰堪敵康樂毫端應挾雪霜清

春日橫山堂有懷謝直夫用前韻奉寄

解道澄江元有聲東山出處更關情高吟正憶西堂
夢妙語又逢春草生沙尾斷蓬垂釣遠峯頭晚日落
船明不將軍騎驚猿鶴巖谷猶傳此段清

草堂東橋翫月

坐看冰輪碾太清赤欄橋下水先明光從蟾兔窟中

出人在鯨鼈背上行地隔里門無俗客樓高隣笛有新聲此時迥絕非塵境更聽天鷄第一鳴

謝同年李提舉見訪

曾共丹梯步廣寒自無仙骨墮凡間君攀玉兔窟中桂我返神螺江上山豈謂觀風經邑里猶能駐馬問柴關鳴鷄排入蓬蒿徑踏破巖前綠蘚斑

和趙叔清登殷仲堪讀書臺二首

晉朝人物渡江初爲郡風流只載書臨水重開數間屋宿兵仍富九年儲英豪系出三公後磊落胸蟠萬卷餘東觀諸郎未堪比登車不落問何如

池上開軒對郡樓當時太守氣橫秋聲名已負荊州望舟棹更爲滄海浮插架古書芸護蠹隔溪遊女扇障羞仲堪沒後今千載孰謂人間無此流

春曉招友人

庭前好樹宿煙浮上有珍禽啼不休花發亂紅稠屋角柳翻新綠出牆頭起看霄漢知晴色旋買壺觴辦勝遊乎旦爭門人競入與君先上望京樓

和周公予呈向宰

夜聞急雨洗氛埃慶澤仍從天上回寰海自應遵詔旨管弦何用費詩催東風漸著金絲柳和氣潛飛玉

瑄仄遙想慈寧動新樂禁門清曉拂雲開

次韻黃元授見訪

中興人物起紛紛應有奇才合致君仰視孰為真漢
相夜行何識故將軍且騎駿馬天邊路莫話高樓日
暮雲年少功名方入手勒移休動北山文

次韻胡觀光長慶寺早起

公屢獲盜而不見知於州郡故云

曉大樓殿倚空虛尚見星辰落落踈鶻動高林人起
後馬嘶殘月客行初偶來作尉聊驅盜豈謂論功得
謗書但使一方無犬吠即省黃紙下新除

和黃元喜雨

防城之役村落騷然真採此詩當更講求利病也

天公叱起羣龍顛黑風立海倒百川黃流忽通南北
港白水自滿高低田官軍從來仰征賦農民豈解持
戈鋌雖得一雨洗炎熱夜吏捉人誰使然

次韻荅劉元弼

鼓篋同登樂泮年論文誰復似徐堅向來聚散如春
夢此去逢迎應宿緣陋巷苦無高馬過新詩時有賈
人傳芒鞋竹杖俱無恙歸日猶堪作地仙

次韻何倅雪詩

半夜陰風捲地來平明犬吠恐為災高吟梁苑詞方
就醉卧袁門打不開貧甚此時穿履出興闌何處棹

舟回瓊樓玉宇非人世疑共盧敖上九垓

賀郡守生辰二首

月麗重離日正明星精磅礴應時生詩成五字今無敵賦壓三都世有聲殿閣微涼風乍起門庭當畫雀爭鳴擬將間氣爲公壽編入中興頌太平

鵲印銅鈎幾世傳門中人物自超然高文大筆無雙譽紫府丹臺第一仙會見黃眉三洗骨謾勞青史再編年西林恐未容歸隱將有追烽下九天

蠟梅寄陳相之侍郎

野寺西邊雪壓梅曾陪杖履探春回重尋密竹檀欒外又見疎枝摘素開步屨尋花嗟我老巡簷索笑共誰來細看風味依然在不是劉郎去後栽

和向宰喜雨

夜聽雷車碾太清風翻急雨落平明不憂稻穗已焦卷似見天河欲倒傾狂獄繫囚應盡洗豐年詩句喜先成東郊南畝村村樂草木欣欣亦有情

盧溪先生文集卷第十三

律詩七言

劉美中自翰苑歸追懷平昔之遊再過唐興

寺陳迹依然輒成長奉呈

重尋古壁舊題詩
林竹蕭森上翠微
但見曉猿驚蕙
帳應無山鳥怪
儒衣野僧忽自雲
中出閣老新從天
下歸拍手相歡同
一笑可能長伴釣
魚磯

唐興寺再呈美中

七年三過唐興寺
夢裏聞君得好官
遍歷蘭臺兼柱
史近辭香案出
金鑾從來呼客沽
村釀不敢移厨洗

玉盤政恐人情賤楊柳送迎唯作故時看

送胡邦衡之新州貶所二首

囊封初上九重關是日清都虎豹閑百辟動容觀奏牘幾人回首愧朝班名高北斗星辰上身墮南州瘴海間不待他年公議出漢廷行召賈生還大厦元非一木支欲將獨力拄傾危癡兒不了公家事男子要爲天下奇當日姦諛皆膽落平生忠義只心知端能飽喫新州飯在處江山足護持

次韻周公予秋日書懷

酒酣下筆不能休寫盡江南萬斛愁長史果爲何物漢中軍不是置書郵又聞戰馬將休息且任浮鷗自去留觴目西風易增感山川信美莫登樓

和曹溫如都監惠詩

兩脚誤隨車馬塵江湖歲晚始謀身籬邊日醉陶元亮窓外夜呼祁孔賓倒著幣衣迎好客急搜奇句發陽春阿瞞豈但能橫翅文彩風流世有人

次韻呈劉立道宣諭二首

萬里窮民欲叫天天邊御史兩隨軒潁川大姓行當按河隴幽囚自不冤權倖畏威先縮頸姦回未死已羞魂江南癸冗如蜂蟻入奏猶須一夜論

使星光出大微庭馬上風雲日下生斧鉞疑從霄漢
落絲綸如被袞榮歡迎道路初頒詔威讜姦雄不
動聲誰識張綱最年少耆儒空愧舊知名

向文剛讀書齋試雙井茶有懷黃超然雙井

嘗以青沙蠟紙裏細茅寄
人不過二兩今復見之

黃蠟青沙未破封已知雙井社前烘一丘風味極不
淺萬頃煙波興不窮東晉書齋頽壓後西湖山色有
無中危欄傑閣明人眼獨覺登臨欠此公

二月二日出郊

日頭欲出未出時霧失江城雨脚微天忽作晴山捲
慢雲猶含態石披衣煙村南北黃鸝語麥隴高低紫
燕飛誰似田家知此樂呼兒吹笛跨牛歸

次韻謝同年劉子堅生日惠詩 某與子堅

同年生既長同學又同預州里薦名今各潦

倒蟠屈巖穴因生日蒙惠詩次韻奉酬來詩
記某

家祖夢天
上赤文

詩詞清麗筆如神猶記同年歲在申弧矢志高千萬
里煙霄路闊幾由旬曾無紫氣衝南斗空有紅光動
北辰自顧頑才類銅錫敢期陶冶鑄成鈞

和劉元弼亂後見訪

下清談已絕塵莫嗟離亂恐傷神兵戈亦是來
事丘壑還須我輩人吟罷細傾桑落酒歸來倒著接
籬巾茅簷近喜聞鷄犬步屨尋君去亦頻

朱通判見訪病不能出以詩謝之

鳴珂傳響動比隣爭看題輿朱兩輪節擁兵符分半
刺道經山邑訪閑人行春號令清如水落筆篇章妙
入神應念窮愁病書客經年顛顛楚江濱

和井令西山石屋感雨

漸見時平草木蘇姦蹊盜穴已涇豬登山敢憚牛馬
走置酒誰呼陳趙予助魃旱龍初偃蹇隨軒飛雨不

躊躇雲騰石屋蒼崖峻磨刻行當侯璽書

次韻謝處州倅毛長吉見訪惠詩可文翰謂達

有客江邊問草堂銀鞍白馬爛生光不嫌茅屋絕低
小住坐竹陰移晚涼入洛聲名動冠蓋傳家文翰左
巖廊高風誰復如公者肯接山林氣味長

再次前韻二首

邂逅忽登君子堂眼明初識斗間光如窺銀漢織塵
靜更酌金盤曉露涼玉座正臨天北極蓬山歸直殿
西廊野人不識昇平事但覺江邊白日長

毛公過我竹間堂贈我新詩敵夜光盛德自爲南土

秀清風何羨北窓涼
漳江日落人爭渡
古寺僧歸月上廊
揮塵細談家世事
時材無復數眞長

和胡觀光黃元授二首

樂天微之同試制科各織鋒細管筆二公

同年登科故云

兩翁忽動鱸魚興
膾縷無聲雪落砧
細管向來曾並試
清流可賦共誰臨
好詩自昔員如彈
古錦何勞嘔出心
一覽雕章知格律
吹笙學得鳳凰吟

卧聽蕭寺五更風
錯打當年飯後鐘
不願綈袍憐范叔
獨綠蔬饌識茅容
黃旗接武來招盜
皂蓋行春且勸農
如此偷安欲持父
荒謀誕計恐無庸

讀韓文公猛虎行

夜讀文公猛虎詩
云何虎死忽悲啼
人生未省向來事
虎死方羞前所爲
昨日猶能食熊豹
今朝無計奈狐狸
我曾道汝不了事
喚作癡兒果是癡

向宣御生日

庭下秋風吹紫蘭
蟠桃爲壽菊煽爛
厭分銅虎天邊郡
屢直金鑾海上山
洲渚忽然生戶外
歲星今却到人間
願扶帝業須難老
穩踏龍墀尾近班

次韻歐陽叔向寺丞早春呈周子發知縣

冰底涓涓已作聲
曉看春色上蕪城
江南樓閣煙中

出檻外山川翠欲萌
梅點宿粧凝笑靨
柳搖新綠換
枯莖化權初入東風
手莫使階前草亂生

謝劉時昇見訪

訪我林間一病翁
數椽茅屋貯清風
華裾織翠來天外
揮麈談兵伏坐中
回首此時增感慨
出門何處問窮通
北溟待看鯤鵬變
坳水蹄涔詎見容

送別葛德濟

朔風飛雨未成晴
脫葉打窓雞欲鳴
此處霑襟話離別
向來傾蓋識平生
尚期揮麈堅談壘
不必攻愁用酒兵
北闕上書無計策
誰能穿履雪中行

再和德濟舊韻

小雨霏霏弄晚晴
饑腸過午自雷鳴
鐘聲隔岸聞香積
風味令人想麴生
近報邊頭新奏捷
獨憐江外未休兵
誰能馭此不羈馬
縱使脫韁千里行

題劉端禮達軒

昔賢曾此卧
煙雲鶴怨猿
驚幾度春綠
蕙再遊今日
路青山如對
往年人兒童
共是窓間客
夢寐猶懷席
上塵待得達
軒多種竹等閑來
看莫嫌頻

重陽日送李彥文之衡湘兼簡向豐之

九日君當簇馬鞍
重巖細菊爲誰班
吟登回鴈峯頭

月看盡清湘雨後山莫遣音書和夢斷會傳名姓落
人間向郎理棹歸何晚湖水今應不滿灣

用前韻酬豐之

每煩書札問平安落紙遙知筆管斑塞北未聞輕解
甲江南應得飽看山荒村但有兩三戶廣廈何由千
萬間他日溪邊尋我去釣船刺入蓼花灣

再用前韻酬胡觀光

蔡謚自言為老君牧龍因博戲輸一五色班龍被謫

牧龍天上幾時還因失仙龍五色斑暫謫南昌為隱
吏會歸東觀校蓬山高名久已開江表異氣今由出
斗間下筆不休才思闊清如星漢瀉銀灣

從叔君冕見訪山間自云平生躬耕釣無求
於人中有至樂令某作詩寫其蕭散之狀為

賦此篇

青鞋布襪綠蓑衣滿目秋江白鳥飛小楫扁舟乘興
出斜風細雨釣魚歸有間茅屋臨蒼巘尋箇樵夫上
翠微閒趣牧童吹短笛倒騎牛背入柴扉

和劉元弼見寄

終日思詩句未成夢回春草遶池生拂雲松竹兼天
盡如畫江山照眼明幽處園林皆可隱亂來軒冕亦
何榮即時使有一杯酒便勝區區萬古名

次韻李世京惠詩

童稚情親不記春白頭相見眼猶新
爲文未辦送窮鬼買宅何妨近里仁
魯國儒衣原自少棘門兒戲定非真
斗間縱有衝天氣樓上應無識劍人

和劉端禮避地初歸見訪

庭前喜鵲亂棲鴟知有隣翁酒易賒
老瓦盆隨田舍飲半溪雲屬野人家
莫將釣手遮西日來倚危欄詠落霞
無柰醉歸燈火亂僕夫爭路頗喧譁

和劉允昇夢草菴前月夜看酴醾

誰與東皇殿後塵更無凡木敢爭春
來觀夢草菴前

月疑是廣寒宮裏人雨罷香風吹滿院
夜深笑語動諸隣詩詞要並花奇絕對此吟哦句自新

和端禮惜花苦風雨之句

花逢暮境已侵尋庭值狂風不可禁
已捲殘紅隨日脚更吹嫩柳到眉心
明朝藉地猶堪醉小雨籠晴未作陰
騎馬訪君春好在不勞鐘鼓報新音

盧溪先生文集卷第十四

律詩 七言

題曹子方詩集後 靜常先生初以詩得名
於兩蘇公每恨不能多見偶於公之孫仲實
大夫家見其家集輒題數語于後

橫槊當年知阿瞞後來誰復識波瀾兩蘇門地陪高
詠千古文章得細論耆舊只今無此語風流端要善
清言想當巧匠傍觀處洗盡人間斧鑿痕

次韻劉升卿惠焦坑寺茶用東坡韻

焦坑因東坡始

見重於時

日出城門啼早鴉杖藜投足野僧家非關西寺鐘前
飯要看南枝雪裏花玉局偶然留妙語焦坑從此貴
新茶劉郎寄我兼長句落筆更如錐畫沙

嚴子陵釣臺

巨石崔嵬枕碧流何人曾此坐垂釣足加帝腹動星
象手把漁竿還故立固異山靈回俗駕不因鱸膾憶
吳洲當時冠劍今何在獨有高臺萬古留

送劉美中舍人赴漳州二首

一麾初出銀臺路手把漳南玉獸符閭里高門容駟
馬旗旄夾道擁前驅兩科名姓驚天地西掖文章似
典謨詩卷從教傳海賈釣竿未肯拂珊瑚

漳浦城高南斗邊朱旗遙拂紫薇躔遠民初識玉皇
吏屬邑行瞻刺史天此日分携雲際寺老僧留酌石
間泉祝公名宦何時了了却歸來作地仙

次韻羅世英

世英昔年從學蒙嶺書齋

相別三十餘年紹興丁卯重陽日復相會于
盧溪草堂世英即席賦詩次韻酬之是日坐
客皆預免解唯劉世臣得失未定須臾解榜
至巍然在選

蒙山三十年前話聳壑昂霄見此郎雲子新杭抄飯

白石泉擊火試茶香英豪滿坐驚頭角錦繡詩成出
肺腸此日此公逢此客更傳秋榜助飛觴

送歐陽南卿并簡胡紹立

蕭灘傳榜到柴扉喜見高名掛棘闈二子文場初得
雋老夫茅屋亦增輝方驚絕岸孤峯出更待刺雲雙
鶴飛盧肇風流今未泯渡頭重看錦標歸

和裴主簿九日

欲上高高嶺路微疎林蔽日尚堪依楓江水冷天初
靜桐井霜乾葉亂飛籬下採花人獨秀山頭落帽客
何稀金壺倒盡重沽酒莫惜朝來更典衣

安成逢書守李西美舍人二首

掖垣清近泰階傍新賜魚書綰郡章手把玉堂青纒
管坐褰刺史赤帷裳紅旗照日三千騎白粲連帆一
萬檣幾夜紫微躔次靜飛星今入斗南光

妙齡高義動神京獨出漢庭諸老生鳳閣綸綸朝視
草麟符分閫夜談兵猶聞豺虎縱橫在已覺山河氣
象清欲會風雲扶帝業先令草木識威名

喜楊文發生子

觸目琳瑯滿戶庭又聞白母夢長庚杜家驥子誰家
有天上麒麟地上行豈但疎眉驚香拔更期洗眼看

飛騰人間萬事何時足但有佳兒了一生

周公予監場解官

終年騎馬上山坡鑄得中都錢幾何解組可能留不住扣門猶許問無他莫因時事輕悲感從此新詩更琢磨竹徑松窓與塵隔幅巾聊且重相過

和劉元弼筠亭

種竹誅茅欲傍亭亭前花草莫爭名笋根稚子春無數枝上鷓鴣晚更清翠逼衣襟添野興葉翻風雨打窓聲何當萬木凋零後尤見青青不世情

和劉元弼邃室

竹徑潛通幾許深遠窓寒色半晴陰朱輪畫轂走何事明月清風愜素心宴坐壺中觀慧景時遊物外拂塵襟此君定自能留鳳更絕飛鴉噪暮林

和李巽伯少卿新年憶行在二首

解賦新篇憶帝臺行宮樓殿亦巍哉應曾身作壺中客記得春從天上來雉扇齊開香霧繞龍墀暖赴曉班催君王神武多餘暇綵勝金花似舊裁

去國東風又一回江村度歲亦悠哉偶逢花向山間發更喜人從日下來破敵屢聞胡騎走急賢當有鶴書催內中誰進春詞帖西掖須憑大手裁

和謝夢叟思鄉用李巽伯韻

江頭野老哭聲哀
宮殿千門安在哉
御路初傳鼙鼓動
驛塵猶見荔枝來
九重竒禍遽如許
四海軍書重困催
家在雙龍雙闕下
亂雲春思益難裁

次韻謝鄭教授二首

久服才名老鄭虔
奮鬚抵掌便談天
平生落盡摩霄翮
妙句新如出水蓮
晚歲江湖聊可樂
夜談城壘不須堅
席門窮巷蓬蒿滿
安得高車忽儼然
騎馬凌風擬八仙
不須三斗始朝天
細聽街吏鼕鼕鼓
看舞歌姬步步蓮
問事未應無伯始
論文今復得徐取

喜君啄句無餘跡
詩到無成却澹然

和曾英發見寄二首

聞君要了官中事
了事君今竟作癡
陋巷端能一瓢足
虛名何用四方馳
開簾壁月夜生海
下筆氷蠶細吐絲
想得詩成有新句
池塘草入夢中思

別後文章殊長進
揮毫落紙便風生
詩從平淡人難到
語不雕鑿句自清
無計上書通北闕
猶時蹙額問西征
憶君過我誦新作
殷殷尚留金石聲

和曾若虛

書生胸次儻無竒
讀盡羣書未免癡
學似雕龍宜獨

步才非天馬敢爭馳青編謾費千章紙白髮愁梳滿
面絲愧乏銀鉤酬雅貺含毫徒作畫沙思

再次曾英發

人物風流東晉時吾家王椽本非癡見君自少能多
學厥聞如今已四馳但有香杭炊白玉不須高馬鞞
青絲西隣密度墻頭酒日望扁舟慰所思

次韻蕭明強追和芙蓉菴

茅齋深倚五雲間忽有高人夜扣關揮塵風雷坐傾
倒開簾水竹自幽閒天寒已放龍蛇蟄棊罷那知歲
月殘兵革未聞消息好且來拄頰看西山

次韻周秀實過草堂夜話

舍北雲生天一隅短檠細雨夜窓虛銅爐瀹茗助清
冷玉麈論文愧闊踈落齒駒兒應有種謂秀實子秃毫錐
子尚中書山城忽遇高軒過不避席門江上居

和裴主簿栽花

來詩有獨醉
明月之語

曉簷風雪壓前墀勒住羣花未出竒頓覺寒聽有春
色雅宜破屋詠新詩朱簾不捲門長靜紅藥微開蝶
便知獨酌莫邀天上月恐招惡客影相隨

和劉克強謝仲振

水柱雪車詩有聲池塘春草夢初驚兩公共夾清漳

住匹馬時衝細路行
遶屋好山如罨畫
攻愁得酒足
麈尾與來不用多
呼客著我罇
前伴月明

送蘇元老自春龍陽

雲渺蒼梧湘渚闊
煙帆初轉九疑高
相逢未卒寒溫
語此別更爲魂夢
勞江水江花自今古
湖南湖北足
風濤何時捨棹登平陸
却上晴天跨巨鰲

次韻義夫同年見寄二首

青袍猶帶御爐煙
坐覺江湖歲月遷
憶在九霄聯鴈
塔恍如三尺鑄龍泉
薦書飛鸚聞天上
綵筆題詩落
眼前白髮郎官才力健
知公家世似韋賢

高文落紙自生煙
論著傳家繼史遷
氣壓千軍橫入
陣詞傾三峽倒流泉
賜袍初並龍墀下
走馬同過鳳
闕前一落江湖坐窮困
顧予何敢望諸賢

和劉賓王縣尉

鼓篋同遊壁水春
橋門爭看筆如神
忽傳紫塞軍聲
急尚喜青山草色新
儻有風雲起英衛
可無膠漆似
雷陳況聞作尉功奇絕
兵入潢池不動塵

次韻劉炳先昆仲見寄

未有新詩敵庾郎
徒將斷木點青黃
峩冠不滿三尺
許折襪仍無一寸長
鵬翼端能翻碧漢
芥舟唯可置

一廬溪文集卷十四
七
坳堂君才本自堪磨琢穎脫當如錐在囊

廬溪先生文集卷第十四

廬溪先生文集卷第十五

律詩七言

和歐陽炳文汝舟唐降真臺有檻玉砌焚龍火香薦無憂酒

兩翁爛醉醱醱下擊鉢成詩豈易酬藉地想携千日酒尋香爭跨九花蚪晚風吹雪空中落急水漂香何處流夢覺清芬猶撲鼻如登銀檻薦無憂

次韻胡次舟送歐陽景蘇鎮州教授

往昔逢君最妙年朱霞天半已軒軒論文豈是無張說取友何期得邴原談笑坐輕千疊嶂吹噓誰送九重闈不應海嶠能留滯早晚公車採至言

別黃伯成

常恐微言將遂絕江南耆舊復知名身從妙喜國中
出脚踏毗盧頂上行覺我向來聞道晚識公真處大
僧生相思莫謂山川阻千里同遊聊

送同年趙季成赴行在

繫船楊柳曉鶯邊冠蓋如雲欲塞川聞道今開丞相
府沈相昔年同是廣寒宮不須左右爲公地便恐吹
噓送上天千載一時真慶遇會看鈞力轉陶甄

送劉子東赴省

快鎖荊州從事廳薦書飛入九重城試官文陣英雄
氣定勝弓弦霹靂聲霜踏板橋天欲曉酒醒漁浦鴈
初鳴春風漢殿臚傳近換取青袍出帝京

趙逢源家有妹麗每造謁必見拒今侍令兄
府判東遊作詩爲別兼以見意

高門日日掩朱扉未許傾城捲翠帷客子眼寒空過
市雪兒歌妙欠新詞華裾將曳銅駝陌破帽敢隨金
馬羈悵望碧天鴻鴈影黃花應不負歸期

次韻趙文卿因以送行

堤柳迎人自作陰江流仍漲綠醅深行人獨唱陽春
曲此日重聞正始音騶馭已如仙裏裏騎驢徒欲度

駸駸者君闊步青雲上莫學書生擁鼻吟

和施通判以詩惠茶

綵筆題誇北苑春南來草木始稱珍江湖風味極不
淺翰墨篇章老更新落日清吟招惡客此時佳境屬
閑人慙無好語酬高詠東望雲山意莫陳

再和

與客觀詩碾茶因
話時事再作此

呼童急碾建溪春麗句兼收掌握珍陸納家風元冷
淡庾郎詩句自清新推之不去真何物試與偕來端
可人當面輸心多背笑愛君高義似雷陳

密雲初識雨前春未羨官厨送入珍正苦睡魔須料

理愧無妙語敵甘新兵分刺史千餘騎系出洪崖幾
世人麗句新詞隣大雅豈將文體效梁陳

重陽日劉元弼亭席上

時坐上聽端
禮舉省程文

不見龍山老子孟嘉風流誰更落烏沙松槽旋壓初浮
酒籬菊爭開無數花清論揮犀傾玉雪高文射策走
龍蛇小兒拍手攔歸路笑插茱萸待辟邪

周德祖自衡陽相別三十餘年會余竄夜郎
德祖知南江寨相遇甚款道舊興懷輒成長句

回鴈峯前水拍天峯頭一笑尚依然休論華屋生前
美同在邯鄲枕上眠騎馬忽來臨紫塞傳家故自有

青氈時平搗壘無烽火灑墨成詩有幾篇

九日以菊花酒寄施醇翁通判

每逢佳節憶淵明自採籬邊細菊英坐見南山橫紫
翠遙聞北地落橈槍澆胸止賴杯中物快意豈圖身
後名幸有酒兵堪一舉請公談笑下愁成

盛暑中黃子餘主簿携雙井茶見訪

痛飲元非避暑方又無金盃汲寒漿忽逢佳士携新
茗來坐竹陰移晚涼幽處小窓花木好吟餘清論齒
牙香君家句法誰能似煎出車聲遶九腸

次韻鍾令君自言借隣僧衣著

閑舉酒兵挑一戰愁城欲下戰方酣且烹北苑龍香
茗暫脫東禪鶻臭衫有志干時君自許無錢使鬼我
何堪江湖寂寞生涯盡對客不應容易談

感雨 癸丑 天久不雨羣情焦熬郡府方索

民築郭縣內惴恐旣而禱雨石屛山連日大
澍喜而作是詩呈縣令黃平國

拜起爐煙繞碧虛卧龍隨雨躍天衢道邊草木已焦
卷巖下風雷若指呼河隴豈無冤繫獄海汙防有浴
川夫君王屢詔寬徭役亦念周氓苦未蘇

和李彥文春雪

鳳字集卷五
四
聞道江城雪似沙東風吹動曉寒加輕飄瓦屋鱗鱗
密亂颭檣竿櫛櫛斜著地正憐新種竹漫天故壓未
開花君應對此方乘興飲似長虹汲海涯

縣僚禱雨盤藤廟連日大澍次韻黃超然

上林

抄半空雲走挾雷聲早妖作魃乘時起天意爲霖轉
眄成莫問田疇水深淺縣前江已拍堤平

再和前韻

江夏無雙望久傾高文猶帶玉堂清子雲識字終投
閣侯喜能詩新有聲偶會風雲蘇大旱戲將筆札慶
垂成年豐但使無公事勿慮潢池賊未平

喜劉世臣仲美及第

同上青雲踏玉梯仍穿月脇取蟾枝江南魁薦星文
動蘭省名高天下知共喜秀光前日會爭傳真逸老
人詩萬牛回首扶梁棟可笑蚍蜉欲撼時

送歐陽廣明遊仰山兼簡慈書記二首閣中

釋金
欄裝袋

士窮不作儒生酸歲晚聊爲物外觀行脚僧從幽徑
出集雲峯倚半天寒且携幾緡登山屐勝走高門坐
馬鞍君見堂西舊書記試求開閣看金欄

不畏霜風射眼酸
要登峯頂作竒觀
連天野水微生綠
隔岸官梅已破寒
試共稽康尋石髓
要隨杜老逐金鞍
歸來山鳥迎人鬧
應是怪君猶布幘

次韻送別曾英發

士元來訪潁川公
桑下清談有素風
不扣洪鐘安識響
更聞妙句豈宜家
如君晚節猶堪奮
期我高名莫大穹
此別應難問消息
寄書無惜到山中

和劉元弼歲除書事

吟詩輒莫歎年終
歲歲年年事不同
藍尾旋傾人半醉
樓頭猶聽鼓三通
漸看暖律回春檻
且任狂風揭釣蓬
管有明朝好天色
淡雲微雨翠煙中

題譚微仲一經堂

漢儒重道獨專經
唐室初增博士名
韋氏起家仍相國
稚圭能說亦公卿
司空城旦污潢潦
古壁遺文粲日星
異日諸郎拾青紫
傳家何用滿箚籬

盧溪先生文集卷第十五

盧溪先生文集卷第十六

律詩七言

九日登鴻飛臺

拄杖扶登何處臺，天高風急鴈聲回。
疎林紅葉紛紛下，遶逕黃花細細開。
此地崔嵬聊試脚，明年強健更
啣杯。綠罇烏帽隨時足，無用白衣人送來。

豫章別彭養直

時謫辰州

荔子欲丹蕉葉黃，別君南浦正淒涼。
九疑隔嶺共明月，萬里窮途非故鄉。
坐見浮雲更百態，行吟秋水動
三湘。金鷄放赦知何日，尚許生還天一方。

送任子嚴江西運幹

正坐懲羨吹冷壑送君那復有新詩明朝便恐隔千里抱病何由把一卮西蜀文章自家法江南煙雨上樓時東湖滕閣多佳興落筆端能寄所思

留別黃子默

回瞻人在斗南邊目斷湘中萬里天驅馬又過衡嶽寺携家却上洞庭船江湖足了平生事文字豈徒今世傳不共離亭一罇酒行看待我著歸鞭

次韻郭偉節段延直見寄二首

辰溪古夜郎郡太白嘗謫焉

山靈未忍勒銘移空有寒鴉噪竹枝二妙相逢春霧裏老夫將竄夜郎時傳看尺素雙魚尾突過黃初數子詩不上沅江探竒絕平生誰肯一來茲
邂逅江樓初識面騎驢衝雪登詩肩談傾坐客人如玉蘋滿汀洲水拍天君欲摩霄登兔窟我方載月上漁船夜郎千古窮愁地竄逐曾留李謫仙

渡瀟湘江

夜聽瀟湘江上雨今朝雨裏渡瀟湘船衝曉浪漲新碧山似畫圖非故鄉鴻雁來時應好在白鷗飛起忽成行論詩安得杜陵老望嶽令渠賦一章

自江上遊龍興至淨因寺

曉踏晴沙江上堤堤平沙盡草萋萋墻頭野杏纔先
發葉底雛鶯自在啼問道漁舟通臘水只應煙火是
桃溪深村疑有秦人在記取來時路恐迷

賀王彥恭新除湖北漕

年年新換玉麟符應爲高名滿大虛紫塞初分邵陽
壘皇華初上使臣車木牛轉粟洞庭野金馬催班待
詔廬旗鼓行春真畫錦可能一訪夜郎居

寄湖北總領彭子從郎中

翼軫星邊貫索躔星文夜動紫宸居追烽急召歸郎
省持橐猶稽侍玉除六路藩臣供餽餉五溪蠻子樂
耕鋤連營十萬無饑色却入承明奉直廬

春晚同石子文遊歐陽參軍園問其主人已
物故獨一老婦開門亭檻幽雅醪醑方盛開
因歎二年卜居隣巷相去數十步而未嘗一

作詩記之

百花狼籍草如茵誰與東皇殿後塵故放醪醑教獨
步更無凡木敢爭春杖藜亦偶逢幽徑扣戶何須問
主人坐久忽思歸路晚舉頭香雪落烏巾

居隣曲巷有朱扉未許墻東宋玉窺春草滿池驚晝
夢醪醑萬朵壓繁枝湘西江上叅軍宅黃四娘家子

美詩他日沅陵尋故事爲余收入楚人詞

送黃彥謨通判岳州 時胡冠未平

竒功已奏紫宸居新上南州別駕車木葉寒飛洞庭
野樓船光照赤沙湖猶聞豺虎縱橫在已覺江山氣
象舒萬一潢池羣盜息回戈請爲掃狂胡

朱致一來守辰州先致啓書余以病未及荅
而致一壓境以詩迎之

麗譙高壘武陵西西望雙紅捲使旗玉帳靜驅千騎
努銅符遙鎮五溪夷我遭白簡爲遷客君擁朱輪把
一麾諸洞帶刀迎馬首略無征鼓動邊陲

閏十二月自城東泛舟遷居城西安福寺舟
中微雪

朔風吹雪江上來急槩迎風蕩不開渡口雲蔽伏波
廟山腰霧失楚妃臺移居自作泛舟樂抱甕還如載
酒回歲晚浮家寄何處兩溪春水綠如醅

李郎中生日

三槐堂下清陰滿太華峯頭綠葉圓天上正開炎帝
曆人間初識歲星年名郎早合歸華省藏室行當綴
列仙雉蝶新崇邊壘壯長城不獨有前賢

報恩寺避暑

風枝不動午雲蒸古寺嗟峨倚石層百丈虛廊蔭華
楠半簾踈雨斷飛蠅疔餘已怯金罇酒捧立仍無玉
盃冰柰此人間諸熱惱一杯清茗屬高僧

乙亥立春夜雨平旦大雪

青帝重扃夜半開先驅雷雨下天來千門萬戶春風
入小院高樓樂事回但喜新年逢瑞雪不知平地有
瑤臺杜陵遠客多愁思忽憶兩京初發梅

和馬德儉韻

兩蘇共賦靈芝句知是君家矍鑠翁門巷偶隣三徑
竹功名當柱五溪銅似聞四海塵初靜猶恐扁舟興
未窮螺子江邊無久滯亦宜搏翮上晴空

劉時舉主簿相別三十年忽相遇于沅湘之
間古夜郎郡也郡索窘俸饋不繼垂橐而歸相
聚月餘賦詩爲別

謫仙適竄夜郎道主簿歸從飛鳥邊但喜騎驢得佳
句忽忘揮麈是何年且將肚束三條笈敢望腰纏十
萬錢剩斬湘南幾竿竹他時分我釣魚船

早春懷葉觀察

門前江水有春聲鷺浴沙汀照眼明詩律未堪傳樂
府酒兵聊且下愁城無窮澗草爭青出自在巖花絕

壁生忽憶江南護戎老晴窓磨墨聽新鶯

送頓子還廬陵

頓子遠來夜郎省余聞

其婦方臥蓐不欲久留而戀戀不忍去乃令
上沅湘至昔人窺九疑處得下武陵溪入荆
州由巴陵武昌洞庭黃帝張樂之野觀開闢
以來造化擘出瓊雄怪譎之處却由瀟湘以
歸樊廬作數語示之明日乃行

東歸未辨武陵舟送汝翻成一段愁雪點弊裘騎瘦
馬春寒幾日到荊州湖山天開洞庭野吳楚月明黃
鶴樓莫苦回瞻白雲嶺是行聊學子長遊

次韻葉起商楊茂之

池塘春草年年綠筆力千鈞挽莫回南國遺騷拾蘭
芷西湖體雪禁梨梅窮途言詠頗寒窘治世音聲無
怨哀一覽巨編真雅唱秀苗竒特出荒萊

次韻酬祝彥直

矍鑠猶能一據鞍將軍雖老未甘閑謬携魚目投龍
額正類蒹葭倚玉山詞力倒傾江漢底光芒今射斗
牛間珠璣贈我應難久却恐風雷夜掣還

李守拉登譙門觀修城

忽見金湯峙塞垣麗譙雄冠楚山川門開下瞰雙溪

水壁立新磨萬丈輒招撫蕃夷應有術折衝罇俎正
臨邊邊頭卧鼓休戈甲坐對春風理管弦

次韻李宜仲見懷朱崖夜郎二逐客

不因貴賤識交情此段當令後輩傾三友一龍吾作
尾同時四海孰爲兄殊方少客通南北厚祿無書訪
死生萬里歸期應可指九衢先聽賣釵聲

辰州僻遠乙亥十二月方聞秦大師病忽蒙
恩自便始知其死作詩悲之

辰州更在武陵西每望長安信息稀二十年興緡紳
禍一朝終失相公威外人初說哥奴病遠道俄聞逐
客歸當日弄權誰敢指如今憶得姓依稀

次韻段季裕惠詩二首

久戰詞場力未衰毫端珠璧粲離離氣如八尺九花
馬人似千年五聚龜國士無雙君自有癡兒不了我
先知七年留滯沅湘道忽詠青山獨往詩

謫墮西南海角邊是中樂事亦天全漸聞長樂鐘聲
近正遇巫陽敕放年客過茅蓬非率爾詩如錦繡益
飄然一罇豈盡平生話咫尺高樓起暮煙

次韻葉起商

少年携藝試東都一鼓無成怒舊鬚便把龍韜取官

職欲隨鵬海混程途清言自可容平子文筆誰堪荅
摯虞要使貂蟬出釜鑿腐儒寧不愧操觚

和向令製錦軒

大邑大官身所安欲將何術撫創殘久懷利器聊堪
試正見操刀不作難百里光華風俗美一天清淡水
雲寬剝裁大巧元無迹血指從旁袖手觀

次韻酬劉遂卿

夜郎逐客東歸日傾蓋江邊側帽時霧豹隱山宜自
養弓蛇落盡莫生疑古今得失碁千局湖海飄零酒
一卮期于斲然出頭角名揚何患少人知

盧溪先生文集卷第十七

律詩 七言

初至行在

望中樓閣入青冥疑是長安舊帝城千里荷花開世
界幾年羈旅望神京老隨丹詔身猶健夢入華胥眼
尚生行盡沙河塘上路夜深燈火識昇平

上殿退朝口號

銀臺南畔曉雲飛路入丹霄上紫薇共看客星朝帝
座敢將汗脚踏天扉遙瞻鳳翼差池侶近對龍顏咫尺
威自愧衰袍正藍縷晚來忽帶御香歸

送王舍人赴明州過闕二首

紫泥初出大明宮，端為朝廷知弱翁。平地便開丞相府，烏臺先跨玉花驄。一時治行無前輩，共喜君王記自公。暫假雙旌臨近輔，聊觀海日正瞳矇。

當年玉殿校羣材，名占樞垣北斗魁。曾入翰林批鳳尾，每瞻雲氣想蓬萊。前驅候吏千軍肅，遙望天門九扇開。咫尺龍顏應入奏，紫霄東畔曉班催。

次韻楊廷秀求近詩

聞說學詩如學仙，怪來詩思渺無邊。自憐猶裹癡人骨，豈意妄得麻姑鞭。曾似千軍初入陣，清於三峽夜流泉。只今老鈍無新語，楓落吳江恐誤傳。

胡邦衡移衡州用坐客段廷直韻

朱崖萬里海為鄉，百鍊不屈剛為腸。復出光芒動星斗，定隨雷雨起江湘。歸期正待春回鴈，賀客爭持酒滿觴。笑說開元丞相宅，淒涼偃月上標堂。

次韻張子家見訪惠詩

僕嘗為逐客故以台州自況

老去無才可致君，強從詩社立奇勳。忽逢天上張公子，應念台州鄭廣文。風月何嘗千里隔，江山不用一錢分。能來鼓譟助餘勇，氣壓淮淝百萬軍。

用前韻贈別子家

西掖舍人彥實之子

西掖篇章自一門君能祖襲有殊勲風流前代黃花
句夢想當年紫鳳文月下長吟成獨唱壁間強詠共
誰分江頭惜別多新詠秃筆猶堪殿後軍

送黃子默湖南機宜

潢池赤子弄鋤耰天子擇日除元侯今君去爲幕下
士多材應與幄中籌官弩近圍臨桂峒捷書飛入未
央樓想當磨盾何露布何異裴公取蔡州

送同年趙季成知武岡軍

收科同日上蓬瀛獨我胡爲顛顛生晚節見君乘五
馬前驅夾道擁千兵行間峒窟煙霞靜卧聽邊城鼓
角聲入境旌旗應動色更看蠻戶帶刀迎

歐陽彥文晚始得官爲邊郡獄椽乃州里宿
儒於其行也詩以餞之

往日高名動場屋青衫未足稱平生一官曹椽當蠻
徼萬里山河列漢營顧我老無投筆志羨君今去走
邊城邊頭已卧將軍鼓早晚書來說太平

送趙文卿之湖南

霜餘新鴈點汀蘋愁絕送君湖水濱自歎老夫如病
驥早知公子是天麟渡湘懷遠煙橫渚望嶽題詩雨
墊巾想見騎驢得佳句賸將收拾錦囊春

次韻張子家新除浙西撫幹見寄

幕府官清比縣僚升沉何啻九牛毛蓬蒿仲蔚今多
病湖海元龍氣尚豪麗句早知何水部舊交誰記柳
儀曹相如屬思寧遲久不欲詆俳恐類臯

次韻路節推瑞香幽蘭

君家蘭玉盈階砌傍有薰籠錦一端雅似高人來席
上幽如靚女出林間芳叢欲吐新芽長深谷知誰着
眼觀謝氏風流元自有更留佳客奉清歡

謝安石欲子弟

如芝蘭玉樹故自有一種風味瑞香古未有獨見重於近世遂得家客之稱一名錦薰籠

楊文發自長沙相別忽來權邑惠詩次其韻

公來權邑官妓逃亡略盡

湘水東邊喚渡舟湘天欲暮使人愁豈期陶令來爲
縣應念龐公不入州索我題詩今老矣看君下筆幾
時休論文把酒誠堪樂莫歡罇前欠杜秋

次韻楊文黼

烏啼鵲噪竹生風誰過柴門訪病翁清論逼人來疊
疊夕陽歸馬恨忽忽遙瞻紫極黃雲裏却望長安醉
眼中南北車書將混一莫嗟吾道隔西東

次韻黃伯思求其祖夢升墓銘跋

妙句高文滿錦囊坐驚蓬壺忽生光君家人物代不

乏文采風流想未忘千載運中逢大史諸王殿下識
黃香江西多士傳心印又出宗支一派長

胡邦衡北歸先寄詩二首次韻迎之

無何真是本來鄉莫遣閑愁犯肺腸會見棟梁扶大
厦不將文字弔沈湘揮毫未辯銀爲管沽酒奚須玉
作觴雙竹端能作竒瑞衡人宜護竹間堂

當年大冊撼天扉聖主今呼逐客歸應是風雲乘此
會便令鴈鷺著行飛久埋劒氣衡星氣暫裂荷衣換
錦衣穩上丹墀踏龍尾九霞光裏望晨暉

和吳思道韻寄郭德耘

思道詩有校
雙瓊殿之語

德耘寄示吳思道詩某聞思道之名而未識
也輒和其韻以寄德耘

亂後交遊半不聞天涯淪落始逢君黔南可怪無驢
養冀北遂當空馬羣尚使高才淹管庫忽傳佳句吐
煙雲十年讐校金鑾殿依舊無羶似廣文

左世勣妙年登第而飄泊遐荒十年不得調
蓋嘗以事忤權貴今公道方開始欲仕進索

余賦詩

射策楓庭最妙年九衢爭看若登仙乘鑾豈慕天邊
貴失馬方知塞上賢華轂朱輪多覆轍高門大屋尚

椽脩如今相國開公道此詩他時亦盛傳

次韻酬周孟覺

看鑄銅人能幾何相逢重得復摩挲江山如畫風流
在城郭空驚歲月多豈謂今朝聞正始更翻新律似
元和思君夜久猶竚立月上松梢映綠蘿

聞梁養源歸卧病未出作詩問之

試訪伯鸞強健不但傳煙渚有歸舟欲聞大士一轉
語爲洗南榮十日愁青壁萬尋人似玉碧雲千里月
垂釣我如堪問維摩病獅子坐中無此流

送頓子歸廬陵

西風吹我夢魂驚送子東歸無恨情好往沅湘探竒
絕遠看衡嶽正崢嶸黃昏渡口呼船急後夜江頭望
月明能把愁心寄明月雲開時到夜郎城

送黃介可

潭川螺浦共家鄉醉墨題詩尚掛墻天末異時懷李
白風流誰復數真長那知此日長江簿即是昔時江
夏黃鵬背知橫幾千里棘間何地可回翔

謝同年趙季成通判見訪

一夢驚回四十年昇平樓下聽臚傳共攀玉兔月中
桂認得銅駝陌上仙忽遇旗旄行縣邑先驅貔虎訪

林泉王孫自是經綸手容我滄江臥釣船

送劉克強再赴殿試

聞道田西劉克強年來猶自讀書忙生平萬卷非無用歲晚一官聊足償曾捲笏袍還聖主重携筆札試明光漢庭射策推諸老更看公孫獨擅場

頤軒

門外紅塵走客車閉門風月下簷隅南山霧雨宜蔽豹東海龍芻試秣駒竹几滿團消永日銅爐紙帳夢清都靈龜隱處無人識似置寒冰在玉壺

題青桂亭

天上犀枝玉蘂秋何年桂子落巖幽庭前忽生兩好樹簷外突出雙青虬九里香飄吹夢斷十分圓影暮雲收他時合抱重來看不是玄都觀裏遊

和劉喬卿雪詩

紫極真人吹簫雪降則止

柴門忽啓玉爲關疑是新移海上山野寺僧居銀窟裏廣寒宮在月明間老農擊鼓迎豐歲紫極吹簫近帝寰臘後東風將解凍已看峯頂露孱顏

盧溪先生文集卷第十七

盧溪先生文集卷第十八

律詩七言

中夜起坐惜春亭月照醑醑清香郁然因成
四韻

袖手歸來避世塵醑醑對坐惜餘春靚粧不入市廛
眼幽韻只應丘壑人醉喚江梅君益友力移亭竹我
比隣天公著意憐詩客月色西窓一夜新

任子嚴凌風閣

朱簾下瞰梅花發百尺梢頭掛玉鉤人在半天攀玉
蓋山如方丈接瀛洲曾留深夜乘鸞女相對誰家却

月樓將此層軒擬東閣正緣詩興似揚州

楊文發將趨行朝輒用所惠詩次韻一首贈別

欲贈初無金錯刀待憑巧冶鑄豪曹公家勲業麒麟

上國史聲名泰華高已見郎君如玉樹便為名士讀

離騷甄逢他日驚人去標目須經大手稟節震耀天

下而行狀未能詳昔甄逢能標自其先人甄濟事

載之天下耳目微于天子赫然驚人然濟止能不

汗賊而已其事至微史臣猶特書之今文發以神

道廟碑俱未立欲徒步有請于朝當得大手筆以

張闡其事故篇未激之

寄聶貫遠

褒勲新命日邊傳萬戶重封眷愈專山海盡籠天下

貨江淮流出地中錢時平麟瑞三千歲夢協能祥五

百年富國自能躋壽域寧論齊相海王篇

張紹祖雙秀亭

義山山下三丞相門倚山光照戶庭盛事流傳千載

後寒空高並兩峯青雙崖過雨好雲氣絕壁參天列

畫屏更羨君家亭子近細聽泉溜響泠泠

題竹溪讀書堂

李太白孔巢父韓滉裴政

張叔祖陶沔號竹溪六逸

竹外溪邊沙石幽欲招詩客賦臨流萬竿深鎖葺書

屋百丈清潭遶橘州千里水煙漁唱晚一堂風月暮

雲收何當晚取六君子古此佳名作勝遊

扶疎堂

碧草深林遶一區何年開徑洗煙蕪晨光浮動三竿
日古木陰森十萬夫靜愛長松梢月色絕無凡卉蔽
簷隅殘枝敗葉風吹盡簾捲山尖好畫圖

和曾英發見訪惠詩二首

陋巷誰過馬糞王一經題品自芬芳桃花流水春猶
淺茗椀薰爐話更長千里夙期衝雨霽十年閑事入
篇章明朝未免成離恨莫苦吟詩作許忙

宴坐壺中日月閑相逢無復話吳山如君豈是噲等
伍置我當容平子間喜遇故人持節鉞猶能跋馬問
荆菅扁舟後會重尋處更刺灘頭轉一灣

別後再和一首

平昔高談古帝王到今春草幾時芳揮毫欲上三千
牘折襪初無一寸長疊疊逼人逢此意忽忽下語不
成章歸來閉閣焚香坐端爲思君聊復忙

謁魏彥成郎中

病夫投老入城闈到處逢人說使君豈料騎驢衝大
尹政須扛鼎識竒文池生春草何曾夢楓落吳江誤
所聞更願兼收湖海士當令冀北馬空羣

王主簿清暑閣

鳳樓集卷之八
三十一
冒暑貪程作熱官何如避暑得清安輕陰盡出三湘
境爽氣能爲六月寒自有薰風生屋角不須纖手捧
冰盤闌干半倚紅塵外卧聽江聲瀉碧湍

段廷瑞四美堂

風月江山何處無良辰樂事古難俱其間景物從來
美此美天然盡不如莫唱黃鷄催曉曲且聽青鳥勸
提壺暮雲收盡朱簾捲四者橫陳獻坐隅

次韻周穆卿教授兼簡黃元授司戶

嘗記楓宸賜異恩同時人物亦詵詵從前百事不掛
眼初得微官便退身教授才華欺蜀錦參軍詩句似
唐人中興勲業歸公等顧我徒爲避世民

讀晉史偶書

夷甫清談萬事虛阮宣疊疊定何如鰾魚蝦鮓方乘
獻豆粥萍壑立可須柱石莫傾人棟宇纖兒撞壞好
家居揚州喪敗將誰咎猶自空中咄咄書

次韻贈隨上人

扣馬衲子誦詩聲雙脚行纏拄杖輕何處參同得消
息便能作句吐新清高僧著意遊湖海逐客從誰匿
姓名試聽窟中獅子吼未應斷盡野牛鳴

送李仲文赴省試

何人解薦相如賦

監

流壯志未登龍虎

榜薦書重入帝王州煙生漁浦鴈初下月滿江樓霧
已收早晚書來聞好語沙頭春晚望歸舟

謝梁廉濟運使見訪

夜向天邊識使星使星光近少微明朱輪疑自丹霄
落陋巷忽聞驄馬鳴臺下霜威驚草木山間旌旆爍
簷楹慚無櫺具衣冠偉久服西都暴勝名

離行在別胡舍人

幾年南畝把鋤犁尺一呼來上玉墀未有涓塵答明
主只思耕釣樂清時着鞭不慣朝騎馬擊體猶能夜
讀詩回想都城春色裏看公談笑定邊陲

生日周公予惠詩次韻

皇天何時生此漢六十年前歲遇庚不使聲名驚四
海未教文陣掃千兵如今只作癡頑老晚節猶干造
化情每辱雕童勤剪拂勝驅斗酒下愁城

資深堂

至深無象本強名不可言傳著耳聽克已獨稱回好
學問詩唯有鯉趨庭會須絕倒聞談道更看鼎來能
說經欲造淵源鴈此得百川終使貫滄溟

清暉亭

畫簷雪壁眺前溪溪外羣峯碧四圍日上林梢增秀
色珠生潭底護長堤落霞孤鶩真奇境捉筆題詩無
此詞擬就江山覓佳句更須春草夢回時

次韻歐陽廣明以詩送鉢孟

方丈盈前送入珍山人不是此中人試尋僧鉢齋厨
近更喜園官菜把新秋滿城頭看落葉風吹酒面已
生鱗何時共過溪邊寺雪夜扁舟發興頻

次韻歐陽廣明

來詩問余
遭謗故云

半盂香飯敵猩脣美芋菹鹽度幾春坐倚蒲團聽粥
鼓曉擎花雨供天人庾郎三韭徒多品顏巷一瓢真
絕倫邑犬狺狺尚羣吠隔離安得近吾身

次韻劉唐卿

看鑄銅人五百年摩挲已是落姻緣洛州司馬老方
遇梁苑詞人晚見延稚子詩書聊可喜荒村草木亦
堪憐龐公要說無生話兒女團樂在眼前

雪中訪胡次魚因覽新詩次其韻

公嘗爲郢
州教官

天涯流落與誰同雅什重聞正始時文陣向來無敵
手詩壇今孰敢論功郢中遺唱人難和冀北成羣馬
遂空接屋同隣江上寺過從猶幸不匆匆

和王彥謨縣尉二首

江左盛時王氏門中
高者龍鳳劣猶虎豹

耳壓鉦鼙處處喧此時猶得卧丘園負材礫呵幾無
用舊業荒涼半不存嗟古英雄多朽骨覽君詞翰可
招魂濟川政要餘惶急樽散何因被選掄

虎豹相傳王氏門風流千載識遺昆吟詩作賦取高
第揮羽鳴弓待報恩寇賊漸平妖破膽煙塵猶起客
銷魂山城詩酒方爲樂豈料西歸席未溫

次韻常德府葛倅見寄

武陵節鉞控湘西通守仍兼把一麾玉帳靜談千里
月銅符遙鎮五溪夷漂流欲識荊州面饑渴正如桑
下兒仰止門墻訴羈旅窮愁那復有佳詞

和王彥休

彥休學錄相別二十年蒼顏

白髮著書不倦尤邃於春秋蒙出示註解數
編將欲獻于公車以佳句爲惠誦歎之餘輒

次元韻奉贈

書成欲奏未央宮起廢鉞盲略異同已就外車傳服
氏應曾綵筆夢文通且觀落紙驚回鳳莫歎摩天欠
阿鴻宿學暮年方發策菑川重看一衰翁

盧溪先生文集卷第十八

盧溪先生文集卷第十九

律詩 七言

夜讀唐鑑有作

開元正觀承平後羣盜縱橫似撒沙可惜君王自神
武不知盧杞是姦邪瓜分叛將根仍蔓鼎付哥奴禍
已芽不有汾陽功第一孰能談笑定中華

次韻蔡德億年聞子規

逐客思歸正捲閭三更枝上月微昏一聲夢斷湘山
曲千古空餘馬足痕東郭雖無揚子宅西枝應有少
陵村不須宋玉憐憔悴招得騷人幾許魂

贈胡紹立并引紹立頃年遍遊西南諸州聞
余竄夜郎冒重險至沅陵由湘南以歸已卯秋預
清江高薦復至安成訪別道舊賦詩因以送行
憶昔烏蠻絕塞亭巴娘歌罷月三更重尋湘水江邊
路又見蕭灘榜上名此去飛騰對天陛不應顛顛困
書生將軍三戰成功後未數焚舟老孟明

送項直卿赴省

逐客歸來訪里閭後生文彩益增竒低頭見子如東
野滿耳聞人說項斯果有高名動場屋行觀大策對
丹墀親闈日望泥金信報我仍須寄好詩

劉大虛作十花詞相示復以詩來有求揮斤
之句兼簡中問僕無恙吠犬不爲災次韻一

首奉酬

新詞藹藹吐春雲清似金爐百和焚白雪固宜招吠
犬真雷豈比聚飛蚊陶潛賦就歸何處李白詩成思
不羣君是廣寒修月手顧予安敢強施斤

次韻董體仁叅政

雷雨何年下九天公爲舟楫濟長川涸鱗亦逐龍蛇
動異氣先衝牛斗邊總謂相君扶帝力忽傳飛詔落
巖前但隨一氣洪鈞轉造物豈知然不然

次韻李昌齡以詩督景賢堂詩

李廣傳云得當單于陵傳

亦云欲得當以報漢

欲醫詩病了無方，悵望黃州舊雪堂。歲月易奔梭一擲，文章徒費紙千張。相如賦麗終遲思，李廣兵微未得當。句律年來亦如此，收功何以得鷹揚。

宋英臣景賢堂

當塗人物盡豪英，平日相逢眼自青。傾蓋欲交天下士，披雲如仰斗間星。向來道義多耆舊，尚有風流繼典刑。更待里門容駟馬，不應空頂佛名經。

劉君鼎主簿登第累年家貧猶待闕欲遊章

貢謁梁提刑作詩送之

收科天陛幾年餘，猶似楊雄寂寞居。霄漢又生新羽翼，侯門應許曳長裾。暫遊嶺海非凡客，却上蓬瀛行秘書。何日扁舟下螺浦，會看丹詔有新除。

送劉簡之兄弟赴省

弟兄連榜俱高薦，正遇龍飛急詔求。簡省深嚴清禁近，丹梯曾上廣寒遊。豈惟一舉兩黃鵠，便好同修五鳳樓。草綠江南舊行路，春風歸馬控雙虬。

謝向提刑見訪

并引其自貶所東歸伏辱提

刑直閣千里命駕來訪，死生感激高義輒成。

長句聊伸謝悃

夜郎逐客遇生還秘閣老翁來扣關坐聽犀揮妙言
語慚非櫺具偉衣冠高名業已照六合賤子窮當隱
半山陸納家風元冷淡口將茶果薦杯盤

渡湘千里憶分携因誦癡兒不了詩送我出門還作

惡今朝會面豈前期樂天獨往青山日裴相閑居綠

野時從此功名恐相逼伊山安得久棲遲李訓王涯排陷樂天

訓等死日樂天正遊洛下青龍寺有詩云當君

白首同歸日是我青山獨往時或謂白公樂禍東坡云樂天豈樂禍者特悲之耳余今亦然

送魏彥成赴召

一騎追鋒下九重手持丹詔紫泥封君王夜半應前

席郡國名高莫說功民吏不須留召父朝廷久已知

弱翁還如漢室中興相治行于今有祖風

魏彥成座上忽見擒至吉水賊奉呈彥成

城上啼鳥曉欲狂樓前爭看捷旗黃略驅部曲千餘

騎不折將軍半段槍樂土異時為賊窟太平今日有

官方弱翁治行今如此何待天邊下鳳凰

西園探梅三首

俯窺溪影忽橫斜仰看寒梅已放花未覺東風吹水面
面早驚春色到天涯年時肌骨瘦如許日暮煙雲薄

不遮折得一枝歸靜院夜深玉頰照窓紗
東閣官梅未有詩竹林斜出兩三枝臨風玉面如相
識殘雪江頭想更竒立盡小橋溪上影誰將清調笛
中吹犯寒傾倒先春色萬木寒凝凍不知
一株斜壓半簷茅索笑誰堪著句朝風度暗香浮遠
水枝回嫩綠到新梢冰生處子精神外玉立天涯雪
月交吟處不須歌酒澆柴門誰許野僧敲

次韻劉景明寄詩求近作

道邊垂柳綠陰陰馬上携書閱古今陋巷豈無人載
酒他鄉誰是子知音鯤鵬未化風雲外江海相思歲
月深遠寄雕章覓新句窮愁唯有苦寒吟

外孫劉子野遊學南安纔歸數日又告行忽
忽贈以一詩爲別且以勉之

九十龐眉老舅翁暫時見汝又西東舉頭共看天邊
月刮目知非吳下蒙學至超然應自解詩唯窮者乃
能工大阿鍛盡山中鐵始得光芒倚碧穹

送劉天遊益明赴省

兩驥騰風上九垓瑶林瓊樹絕纖埃行觀海運幾千
里坐待春驚二月雷霹靂一聲天外響娑娑雙桂月
中開老翁日望長安信報喜泥金早寄回

次韻曾英發

泮水橋邊不記年後來誰復敢爭先襄陽耆舊今無
在江左風流寂不傳窮巷閉門佳客至新詩照壁夜
光懸未應晚節嗟流滯三子青袍慰眼前

酬梁宰惠遊永新百韻詩

君曾攝
縣事

問君跋馬禾川道攀轡遺民識轡環滿野悲風蟠蔓
草數聲漁笛下汀灣雲蔽甘露峯頭寺路接青湘雨
後山觸思便能成百韻偶題僧壁不須刪

謝郭運幹見訪

歐陽公有思穎
詩郭乃穎人

窮巷俄留長者韉清風入戶竹生戶不嫌茅屋絕低

小來坐松陰移晚涼南國諸侯老賓客西湖六一舊
家鄉錦囊賸拾詩千首他日還思穎水傍

天馬從來不受韉騰雲注目電爭光心如銀漢織塵
靜氣逼金盤曉露涼妙語織成文繡段扁舟刺入水
雲鄉朝天便若登仙去騶馭何人得侍傍

次韻劉子方喜雪

萬木寒癡凍不蘇六花爭巧出枯株天將平地開銀
闕人似清冰在玉壺未見嚙氈持漢節徒聞穿履待
公車月邊恐瑤臺路擬欲凌空謁帝居

懷故人留題

桃李無言對斜日可堪回首一凄然子雲投閣知何
在太白騎鯨已上天春蚓秋蛇留敗壁金鈎玉帶鎖
寒煙人行古木橫塘路門掩長江上水船

次韻王秀才

怒髮衝冠忘指瑕要能全璧始還家閉門且任蓬蒿
長落筆當令綺繡華麗句美如青玉案明珠深貯絳
囊紗愛君年少已如許他日相逢未可涯

波光亭

遠亭春水縠紋生拍岸風微鏡面平日破浪花搖柱
礎影浮山翠落簷楹魚跳蓮葉東西動月湧金盆表
裏明夜久光凝妝綠淨冷澗星漢逼人清

酴醾

百花狼藉點青苔始見酴醾爛熳開虢國朝天嫌粉
汚唐昌夜月恐仙來寒梅勝韻聊堪友穠李凡姿詎
敢陪便欲乘風凌倒影醉尋香徑上瑤臺

和黃元授送趙敦本赴萬安宰

元授先攝邑
事故末句云

欲救斯民病久疴想君家譜有竒方但須去惡猶去
草要使牧人如牧羊正值雕殘經寇亂還思激烈詠
時康當年手種閑桃李今日成陰總類棠

和元授閔旱

特男
皆防城

旱魃凌空氣愈炎斷無微雨應時霑正憂龍計深蟠
水安得江聲碎瀉簷禾黍似堪供野火婦姑猶擬共
腰鎌此時政要調元手誰作商霖慰且瞻

盧溪先生文集卷第十九

盧溪先生文集卷第二十

絕句

建炎己酉十二月五日避亂鵠湖山十絕句
平昔無才可致君此生何處欲超羣今逢四海干戈
動猶得山間卧白雲

偶携琴劍入山來驚覺高僧定裏回扶下繩牀始開
眼嗔人馬跡浣蒼苔

幡竿插入千巖底鳥語飛來絕壁間洞口行人迷處
所不知鍾梵鎖羣顏

山腰危殿倚青葱知是雲峯第幾重恐有書生來問

道爲憑輕打飯前鐘

竒峯削出青蓮萼遠溜縈回碧玉環氣接混茫藏句
法不知誰與破天慳

洞裏花開透壁霄溪橫三繞赤欄橋他年橋斷人迷
路咫尺山源萬里遙

三渡橋

昔人騎鶴嶺頭歸應有仙居在翠微絕壁蒼藤無處
問時聞清唳揭雲飛

白鶴峯

破臘山桃已盛開飛花無數點青苔莫教流出前溪
去引得魚舟入洞來

山桃花

巖下逢人說亂離十年眼底壓旌旗胡塵復暗江南
路堪羨山僧總不知

贈寺僧

偉岸稜稜似立朝魏峩冠斂想風標可憐有貌無肝
膽何用昂然近紫霄

次韻贈周師禹二首

山中自有陶弘景窗外誰呼祁孔賓不敢移文約周
子升沉共作太平人

晝卧柴門打不開相逢未識濟川才那知此夜聞猿
處忽有新詩隨鴈來

贈李子安

窮居未有四立壁負郭兼無二頃田擬斲雲根結茅

屋不知誰贈買山錢

次韻高秀才

臘盡梅花落不停
笛聲孤起不堪聽
且留溪影弄清淺
更看殘英動曉星

贈松菴僧

菴在深村翠嶺均
獨風捲盡屋頭茅
斷椽破壁何時理
卧看松陰月轉稍

和鄭元清同遊殷仲堪讀書臺二首

晉國衣冠掃地空
漁歌長在水雲中
倚欄欲問興亡事
本末琉璃墜曉風

池上高臺倚碧空
郡樓相對出煙中
讀書太子今何在
寂寞無人繼此風

梁道人借示丹經數冊閱未遍輒告行歸其書贈之以詩二首

丹經汗損幾車牛
奧意難從紙上搜
相見纏腰無十萬
待看騎鶴上揚州

夜半滄溟看日頭
忽聞風雨下層樓
却尋雙徑朝金闕
又誇蒼龍海上遊

謝彭仲寬惠小茶磨并仙茅二首

踏梯割得紫雲歸
琢就雙輪半尺圍
晴日午窓新睡

起掌中輕轉雪花飛

夢具白鷄猶不死曾吞赤鳳得長生向來未識仙茅
草誤向松根採茯苓

次韻魏伯元

公榮自可不與飲子美何時得細論正遇題輿陳仲
舉豈容無禮灌將軍

侯大淵惠花

揚州廟下子規啼曾看花開萬玉妃二十四橋明月
夜春風十里捲簾時

和讀書臺入夜即事二首

池底星光箇箇添半鈎斜月吐纖纖數聲寒笛西風
下人在朱樓捲暮簾

雲捲寒蟾玉暈添嫦娥遙想鬢毛纖此時清境非人
世要坐煙霄不下簾

次韻盧贊元蒙田寺橋亭夜月

青版橋邊秋月明江風不動縠紋平沙頭野鶴摩天
起飛入紫霄雲外鳴

次韻劉美中贈段居士

昨夜送人爲太守今朝不記是何年歸來一粟菴中
坐水在瓶中月在天

次韻贈慈書記

仰山慈書記往來安福

道中數經我草堂識之舊矣復辱惠詩自叙
老洪之裔蓋知僕與洪雅故不可不酬也感
今懷昔爲和三絕句兼簡大仰祖禪師亦覺

乾同門嗣也

慈猶記在湘西寺洪和予左字韻有云云

探驪猶記湘西寺愛我詩如左祖軍慈也果能拈此
句定知詞筆帶煙雲

寂音尊者斷聲聞猶似銜枚未戰軍橫出一枝來大
仰如今不賦暮天雲

老洪作語驚一世筆力可敵千人軍足下馬駒今復
出縱橫踏破嶺頭雲

次韻向文剛三絕

沈謝曹劉擬絕倫唯公詞翰可招魂新詩不拾前人
語文彩風流自一門

吏案堆塵番故紙茶甌浮雪動吟魂長官政擁黃紬
被卧聽排衙晝掩門

詩仙句法可換骨豈但能蘇九死魂要自胷中出機
杼不須剽掠傍人門

兵火之後家藏墳籍蕩然寄居江村欲借書
諸公先寄此詩

卜築江村翠嶺均喜君書室近衡茅牙籤插架幾千冊準擬從頭借一抄

聞道歲書埒石渠仍能一讀五行俱不妨借我遮愁眼勝著閑窓飽蠹魚

歐陽廣明病中覓酒

滿徑蓬蒿貧不病一區寂寞柰愁何杜門芳草長楊賦可是無人載酒過

胡烈臣卧雲菴

小菴深隱紅塵外雲在茅簷四角邊月落烏啼天欲曉驚回何處夢遊仙

和葛德裕寄紙覓蘭四絕句

麗句雲箋敵夜光窮兒得寶但能葳慚無好語酬佳惠徒詠春洲杜若香

林下無人亦自芳幽姿閑淡若深葳與君坐上添幽客勝蕪金爐百和香

君家詞翰妙天下蠶尾銀鈎世所葳贈我雲藍豈宜辱強吟春草拾餘香

兩朶幽花費詠章是中佳境若爲葳何時同上瑤臺頂遍翫芝田蕙圃香

聽麟師誦經

念經衲子亂如麻
心悟方能轉法華
待得蓮花從口
發自牛車上覓三車

荅蕭道人

喚起赤龍耕玉池
鵲巢抱出鳳凰兒
且看火裏蓮花
發十二樓前雪自飛

盧溪先生文集卷第二十一

盧溪先生文集卷第二十一

絕句 讀唐遺錄六絕

梁祖紀

深宮三鼓夜方分
梁祖唯知慮大原
錯料諸兒非彼
敵斬關還入萬春門

李愚劉胸同傳

兩公罷相由諸吏
提印驩呼頗自誇
因謂我曹當快
活月華門外聽宣麻

楊師厚

萬炬千鈺照一城
彩舟猶聽棹歌聲
鐵車空駕黎陽

石豈悟碑來禍已成

成汭

勞役三年成巨艦出師未戰失江陵不知雷滿和州
載始悟齊山截海名

安審信

入閣趨班最後時崇元御史合彈之如何進奉二十
萬便逐臺中乞索兒

馮道

大帝四朝成敗事惟君賣國作功臣平生自謂癡頑
老晚節仍爲謬語人

次韻盧元贊江亭即事二絕句

斜日江頭春又歸半天垂柳拂雲齊流鶯向晚渾無
賴隔水飛來枝上啼

江水磨銅鑑面寒釣魚人在蓼花灣雲開貪看新月
上不覺小舟流下灘

縣尉任子嚴出示從軍陪大將吳侯遊石峒
五絕句奉次元韻頌平賊之功云

東來騎火照松蘿野老逢迎笑語多共指巖前一方
石將軍大劔可橫磨

石窟巉巖鬼不開狂童乘此起氛埃殿前兵馬何曾

出旗鼓初從天上來

錦帶雕弓銀馬鞍鳴鞭飛下白雲山回頭却望經行處已在青蒼杳靄間

不待皇恩下九天將軍兵已入盧川
人妄獻招安策留客丹崖萬古傳

回師小度石門西鐵馬嘶風四百蹄
不爲從軍一時樂捫蘿攀徑豈能躋

贈筠州司戶施文叔二絕句

高軒過我不停輪風袂飄如出嶺雲
渭北江東無盡意何時重得細論文

村巷盡無車馬塵君來笑語動比隣
兒童驚問此何客豐豐清言來逼人

送周解元赴岳侯軍二絕句

將軍欲辯斬樓蘭子欲從之路匪艱
十萬竒才并劔客會看談笑定天山

書生投筆未封侯拔劔聊爲萬里遊
燕頷果能飛食肉要令豹尾出兜鍪

雪中贈別黃秀才

雪欲漫山冰未澌梅花破雪吐寒枝
溪橋漸見黃昏月應有橫斜倒影詩

劉虞卿衣弊履穿有號寒之憂賦絕句以道其意

江上丹楓半搖落簷間青女忽橫陳可憐范叔寒如此誰解綈袍念故人

次韻黃子餘二絕句

沈謝曹劉俱一體風流文彩自難兼黃香獨負無雙譽不管紅塵壓帽簷

秋風動地吹纖末夜雨連明攪寸心西北高樓何縹緲信非吾土莫登臨

次韻劉英臣早春見過二絕句

池草青青細吐芽夢回疑到惠連家東風未暇吹桃李先發寒梅第一花

春至盤蔬有蕨芽紙窓竹屋自成家客來清坐不飲酒旋破龍團潑乳花

送羅孟弼并引孟弼吾年家子也少年高薦

未第今之行朝就蔭補兼謁徑山妙喜和尚平步蟾宮脚失梯當年才命巧相違遭時何必由場屋但着青袍騎馬歸

君到吳山莫問禪禪翁無法與君傳若從妙喜覓言句掀倒禪牀却悄然

次韻周希稷餉耕三絕句

初下車來首勸耕老農爭走道
邊迎歡聲便似承平日不待
暮年政已成

夜聞催餉不成眠遙望官壺
眼欲穿醉倒田間真快樂念
無田者益堪憐東坡種麥得雪而喜復念無田者終夕爲之不寐

莫厭行春馬足勞彈琴吟詠
節彌高盡驅赤子持田器勿
使潢池煩賊曹

贈寫真劉琮并引廬陵劉琮
與其父俱以寫

真名一時玉局老人自海上
歸嘗贈以言由

士大夫益稱之紹興己未過
廬溪草堂詩

余作隱居圖頗有勝處作三絕句

會寫峨眉玉局真遠看前輩
畫麒麟此翁此畫不常有宜
並銀鈎絕世珍

布襪青鞋倚瘦松我生骨相
真生窮煩君畫著漁船上刺
入廬江煙雨中

畫作蕭然物外身筆端如此
有風神蹇騎破帽江南岸不
是尋常行人

送風雅長老并引風雅長老
自衡陽花藥山

金角座中相識一別數年訪
余於安成將遊仰山謁超禪
師留之不可作偈送之且速
其歸也

集雲回鴈兩峯前木馬嘶風鶴唳天他日歸來無一事却教誰出草鞋錢

送胡紹立往高陂遊學

天下干戈未盡稀獨騎瘦馬苦吟詩窮山窟裏携書劍半夜不眠聽鼓鼙

遊湖頭觀桃花行數里彌望不絕有僧新開蘭若於萬花之中留三絕句書辯公房

十里紅香襯馬蹄更穿林樾訪僧扉煙長草遠望不斷忽有鐘聲出翠微

城內僧來城外住寺邊花隔寺中籬花開花落春如許宴坐深房總不知

方丈前林萬木春桃花面目更尖新爲師拈出靈雲話却恐桃花解笑人

歐陽公制糧盡扣門索米戲書絕句送之

聞道瓶中無積粟不憂甑裏有塵埃饑時且就我索食更恐胡奴送米來

次韻趙逢源秋日溪居十絕

溪面微涼生晚風山銜落日半邊紅臨流解賦歸來句知是柴桑避俗翁

門外仙槎泛急湍應從霄漢落銀灣歸來不記河源

路風霧淒淒月滿山

水邊樓上最宜秋天在欄干四角頭覓句正緣償宿債著書元不爲窮愁

仙人山水古今無畫妙詩工可得俱論畫已非前輩手聲詩能作輞川圖

出水芙蓉天與工六郎何事比花紅後生不識李元禮試聽長松引勁風

南嶺浮雲過北嶺東溪流水入西溪秋容清淡石骨露更看明年浪拍堤

昔人萬里醉爲鄉暮越朝燕不裹糧却怕醒來塵外出千艘銜尾夜鳴榔

鷗翻日影弄清溪溪上危巢鳴哺兒林下西風晚來急滿身木葉碎琉璃

千尋塔影照江清古殿金龍蟠繡楹秋色排門入蕭寺閑來飯後聽鐘聲

題畫鯉魚

誰把吳淞江剪斷得此鯉魚長尺半會逢李白過江來騎上青天遊汗漫

適從縣門下經西湖上歸見竹間桃花盛開湖上景物一新因成兩絕句呈向宰

彭澤門前惟有柳河陽縣裏只栽花如今夾竹開桃
李猶似當年刺史家
何處春深刺史家園林猶鎖晉朝花風煙况接西湖
水重起書齋對郡衙

再次韻二絕句

墻根巨竹新生笋竹下小桃初試花竹色花光正如
此香風吹落幾千家
新竹高齋凝燕寢從教細雨落簷花青山綠水中爲
縣臥擁黃紬聽打衙

次韻韓宰上元二絕句

火炬銀花照眼明亂來誰得見昇平邦君解與民同
樂海上初移不夜城
傷時此夜憶神京月照鼇山輦道平朱雀街門舊行
路星球飛上鳳凰城

和劉英臣見寄二絕句

諸葛奇才當十倍謫仙詞句滿三千我惟閉閣捫書
冊掃地燒香亦靜便
胸吞雲夢欲八九日誦古書常數千樽挂枯腸只堪
睡從君嘲我腹便便

幽蘭寄向文剛二絕句

西風黃葉深林下忽有新蘭動地香公子夜寒誰對
語應容幽客到書房

連夜風吹碧玉枝山深寒重得香遲窮秋故出邁往
韻要就高人覓好詩

次韻黃超然

楚詞賦物取香草衆草猶須避國香一辱雕章重題
品何慚清廟薦芝房

雪中遇胡烈臣歸自郴陽戲成一絕

路傍有客騎牛過乞與蓑衣作蓆眠邂逅若能相顧
問和公畫上釣魚船

盧溪先生文集卷第二十二

絕句

衡嶽銓德觀作并引盧溪老人謫沅湘過此
覽故人胡明仲留題同

司諫遊山之樂悵然有懷其人復過西房聽
陳道士彈琴作松風夜雨聲因留一絕他日三
君子不忘遊山之樂必再至焉為余出示此詩
峯頭烏帽翠雲裘三百年來無此流餘論更容平子
否猶勝湛輩峴山遊

碧玉峯前雲滿徑赤欄橋畔柳參天長廊靜夜松風

起寫得餘聲入響泉

清江張氏活人堂二絕句

遠系長沙太守孫謂仲景也家傳太守活人言刀圭一

起人死安得聲名不出門

海底龍宮失護防老龍偷得返魂方聞君夜壓春槽
響携扣柴門乞酒漿

次韻謝昌國

今人不識古人心誰識羲皇太古音如望銀河九天
上聊分一勺濯塵襟

雙田逢蕭國器話別

黃葉西風何處村茅簷立馬問寒溫江東渭北情無
限罇酒他時得細論

和康晉侯見贈

儒生無力荷干戈亂後篇章感慨多但拏筆頭吟白
雪莫挑馬箠渡黃河

雪中以酒送歐陽廣明表叔明

小槽新壓甕頭春盛欲招呼雪閉門卧對表郎說周
易不妨伸頸飲清罇

鄱陽周師禹求清軒霧齋詩

月入柴門夜色新坐堅談壘足佳賓誰云老子興不

淺政恐元規塵汚人

細雨如煙下九垓始聞巖谷隱奇才一朝文彩驚人眼知自南山霧裏來

送彭士貴并引士貴好爲奇偉倜儻之節今日見訪聞詔下出兵征虜即日上馬欲遠遊其志甚壯賦二絕句以贈行

詔謂將軍急擊戎連營已列漢旗紅須君磨盾作露布破陣誰先第一功

大將威名震九州毛錐何補劔鏘頭但歌出塞從軍樂莫笑居鄉馬少遊

劉天錫之子八歲能作大字今年十三矣筆畫愈進有雄健之氣作二絕句贈

羣兒墨汁翻老鴉爾獨落紙生龍蛇郎罷不須頻掣筆渠今自會畫江沙

作戈如挽百鈞弩腕力相能回萬牛江夏當年有童二未聞落筆寫銀鈎

郊外留別友人

不及匆匆把一卮丹楓黃葉助題詩天教遠謫非無意更上沅湘看九疑

寄劉世臣仲美

此道陵遲久已下後生無復立門墻遙知二子心如
鐵端爲盧溪一瓣香

贈無識道人

古廟香爐冷似冰向來土木弄精靈如今萬事都不
會却笑金剛努眼睛

謝張東言

忽見蛟蛇遶壁蟠歸時星斗已欄干山童不識回鸞
字誤認題門作鳳看

惜春亭觀酴醾

東皇收拾春歸去獨遣酴醾殿後塵憐我寒窓賦愁

寂時看玉面送殘春

彭青老好談禪喜作詩有謀身之語借其語
激之

未省前身是道人莫嗟求仕困無津東風動地泥牛
吼簷蔔花開別是春

未能投筆取封侯一食聊須爲口謀日向晴窓研破
硯讀書當讀億那由

好詩渾厚如金玉妙質勿令斤斧侵要識筆端三昧
力夜深山水自成音

漁父詞

冥冥江雨濕蓑衣
夜上高巖宿翠微
夢斷一聲煙草綠
遙聞欸乃扣舷歸

曦上人頃脫塵網可謂俊哉
衲僧也絕句贈之
震林獅子非凡獸
脫網鯉魚真衲僧
宿垢消磨應已盡
竿頭海底任橫行

盧溪先生文集卷第二十二

盧溪先生文集卷第二十三

絕句

遊沅陵劉道人菴中唯一禪椅不置臥榻云
不睡四十年矣戲作二絕

一菴茅屋白雲深
坐待丹砂欲變金
誰信菴中人不睡
滿池春水聽龍吟

九曲江邊雲欲淨
三更海上月華孤
金滄溟底奪得驪龍頷下珠

次韻陳君授暮春感懷

雨餘山鳥百般啼
煙隔桃蹊一線微
南北東西春總

好杜鵑何苦勸人歸

辰州馬觀察送酒

壺頭直下開邊郡勲業誰如馬伏波還見遠孫持漢節坐令千騎擁雕戈

倒盡隣翁老瓦缸使君忽送玉爲漿昌黎對月無詩酒絕句聊酬馬侍郎

董仲儀來夜郎訪死生

雪霾鬼葬山頭路霧失鬼門關外村不謂故人千萬里忽携書冊夜敲門

我識君家董狀元草萊崛起跳天門揮毫玉陛摩星斗持橐明光奉至尊

次韻酬國子生趙秀才四絕句

淵明五柳非無宅子美西枝自有村堪笑長安近時客紛紛騎馬傍誰門

入關莫戀銅駝陌待詔行趨金馬門塲屋若歸丞相府可無公道得推尊

羨君將入銀蟾窟容我歸耕谷口村遙想明年春殿下臚傳先出九重門

聖主方今舉八元何人復掃相君門迂生曲士如丘垤回首方知泰華尊

程子山侍講自靖州貶所歸相會于武陵怪
余顏鬢未改作四絕句示之

誤讀黃庭玉字章醉翻王母九霞觴從茲一墮人間
世獨賴寬恩謫夜郎

問我何年謫夜郎尚餘踈髮未成霜夢朝玉帝窺香
案偷得神仙不死方

欲弔沈湘乏雅章借君妙語酌餘觴已知絕倒如平
子更喜清新似庾郎

莫把蓮花比六郎六郎元自不禁霜君看磔砢松千
尺高節參天孰可方

次前韻酬趙提幹

解作新詩似樂章交情風味敵壺觴平生閱士知多
少聳壑昂霄見此郎

留滯沅湘見此郎氣如九月鴈橫霜麻鞋踏雪穿沙
底賜履他年出上方

謝郭景文寄魚鮓

開緘如見故人面仍喜故園風物來想見金刀落飛
雪何時斫膾共啣杯

雪中喜梁養源惠炭

雪裏烏薪絕市珍能令寒屋坐生春此中有句誰能

道煖得曲身成直身

江上

沅陵春盡草萋萋忽見扁舟繫柳堤誰寄愁心與明月肯隨君到夜郎溪

竄居夜郎雪中杜門數日不出忽郡中送春來始知今日立春

東風來從幾萬里雪擁江梅未放花忽見土牛驚換歲始知春色到天涯

寒食日孟司理送酒

兩翁俱是江南客寒食他鄉歎滯留燕舞鶯啼春未老一罇分我洗窮愁

郭仲質南窓

東風吹月下長汀窓外雞號天猝明時有諸生來問字隔江猶聽講書聲

簷外羣山碧四圍風帆過盡小平堤先生獨坐紗帷裏掛起南窓月滿溪

夜坐聽沅江水聲

雨過風林生夜清坐邀明月正關情漁童酒醒莫吹笛要聽一江秋浪聲

水急灘高欲倒傾來如萬鼓遶山鳴奔流更借洞庭

闊飛浪朝宗壯此聲

辰州立春清首座送生菜餅

聞道春風今日回走尋消息傷寒梅恨無纖手挑生菜也有青絲滿飣來

王巖老携詩見訪詩未究雪下索余作詩贈之扣門有客懷珠玉被褐長吟坐晚暉雪打窓扉忽驚起還將破帽蓋頭歸

君歸大酉峯前住歲晚楓丹蕉葉黃試訪酉陽巖石裏秦人逸興未應亡

初寒方葺火閣而會溪知城周子康惠竹簾火爐審公瑞惠蒲團便足了一歲無事矣作

二絕荅之

細柳將軍來護塞夜郎遷客正窮居火爐恰恰簾垂地足了三冬讀我書

戶外霜風入骨酸誰褰紙閣問平安正憂坐客寒無席遺我新蒲入突爨

寄贈王保躬求小山石

扁舟斗轉五溪灣湘北湘南飽看山袖裏雲岑皆寸碧一拳分手亦何慳

巖蟠蛟虎石骨瘦地飽霜風山脚寒我欲借君修月

手爲持玉斧劈煙巒

寄子老并序子老自江西來赴沅州報恩謂
必取道辰陽翹俟久之忽得書乃趨徑路去
已開堂矣奉寄二絕句以當相見也

半程蹉過夜郎溪不到昌溪問路岐空使辰州亭下
客隔江招手立多時

古錦林邊獅子吼一聲驚倒五溪蠻何人來問山中
景寺在千巖萬壑間

訪清首座觀薔薇

紅玉藥攢青玉枝羣芳淨盡獨開時只應天女回軒
晚散得天花滿竹籬

花開花落春何在宴坐高僧總不知空色難謾禪伯
眼薔薇應待老夫詩

贈別陳君授并序紹興十九年余坐詩語竄

夜郎偶太學生陳君授前二年上書言事忤秦

太師意亦貶居是州二十五年冬秦太師病死

遐方未及聞聖上慨然施曠蕩之恩盡放流人

某與君授始獲生還感恩出涕作二絕句贈別

十載投荒坐獻書忽逢飛詔下荆巫歸來好上昇平
頌已死姦諛不足誅

雷雨沅湘振滯寃皇恩普出九重天乞兒猶戀權門
火應謂死灰能復燃

離辰州

逐客休嗟行路難歸鴻心在杳冥間初驚草尾千重
浪險渡湖頭十八灘

行盡黃茅白葦叢舉頭忽見兩三峯青青盡出湘天
景如覺身離蠻蜒中

尋小舟東下忽見巨艦有作

本是蓬頭漁釣客飄如行脚水雲僧誰家巨艦和州
載笑我扁舟一葉輕

次韻任子嚴

并引余竄夜郎日惠門僧相麟

徒步萬里訪生死東歸過其寺見壁間題詩
乃故人任子嚴見懷嘉麟之義而噓拂之也

時士方以詩爲諱而覩此作感激次其韻

解訪江南處士廬行葢正自與時迂題詩更及夜郎
客此段如今絕世無

君是石渠東觀人小邦聊見宰官身山僧似不孤題
品衆角叢中有一麟

書覺範詩後

并引余昔年遊嶽麓識覺範於

南臺因留數日酬唱詩盈巨軸時侍者數人

皆能詩而圓無佳亦在焉別去既久圓忽携
覺範字見訪悲感疇昔復用覺範韻題其後
憶探驪龍領底珠湘山同賦夜啼烏當時吟罷鬼神
泣此段如今掃地無

戲贈文彥明

江淹才盡一雙筆庾信窮生萬斛愁對客安能吐佳
句墻東老駟正操矛
酒酣拔劍悲生事病起扶藜踏淺莎逆旅正如蝴蝶
夢還家試聽戾戾歌

和羅思武作子房孔明二詩見贈

子房夜半叅黃石手握豹韜揮八極蒼黃忽起振長
流天地風雲皆動色

三雄戰爭海水赤欲攬英豪扶紫極南陽喚起臥龍
人至今草木生顏色

次韻周孟覺記皮老人事

皮老九十餘歲能談熙豐以前事但稍聾耳

百年人物已無餘况說銅人鼓鑄初欲著承平舊時
事政須此老助潛夫

何物龐眉一老翁能談慶曆至熙豐只應坐厭聽鼙
鼓到處逢人說耳聾

人壽何曾有百年再逢甲子換新元眼明重見清平

日自可治聾聽好言

吉州凌波亭月夜

螺浦東邊雪浪生峯頭月出半輪明扁舟欲載銀蟾去一聽蒼龍水底鳴

贈日者張谷

余竄夜郎八年東歸至長

沙遇日者張谷考十年前所言皆不謬余雖老然壽則非君妙術所得而推故末句云夜坐吟詩竄夜郎君將何術考休祥近來偷得西華法不敢煩君筭短長

盧溪先生文集卷第二十三

盧溪先生文集卷第二十四

絕句

癸未春被召東山益老來賀曰趙州八十猶行脚以詩荅之云

八十心猶未悄然橫擔拄杖布行纏都城遊徧歸來日却使誰還湯水錢

寄張正伯求木樨

九里飛香隔岸聞繡簾朱戶闕清芬千林落蕊掃不盡分我幽窓一炷雲

送黃秀才歸臨川

傾蓋江頭酒一罇
高樓驚坐去如雲
別君無語獨長嘯
尚想清音半嶺聞

夜郎東歸黃去非自雙井來惠以新詩妙盡

次韻三絕句贈別

竄逐三危山盡頭
出門入門誰與遊
歸來頗復見此客
下筆論詩不肯休

派後江西出一枝
傳家句法自新奇
諸方知子善哮吼
恐是窟中獅子兒

細看君詩如看畫
無聲詩裏畫何如
蟠胸秀句吐不盡
落筆因成赤鯉魚

贈別僧紹存

老存以相法隱于叢林爲

拈司馬陀頭話作二偈贈之

住山骨相無人識
何處頭陀忽扣關
第一座中聞磬聲
已知輸却大瀉山

踢倒淨瓶呼木楔
華林已坐一生窮
却教一座爲山主
都在頭陀相法中

和趙伯達二絕句

王孫疑是李長吉
詩句兼如孟浩然
亂後相逢初識面
便當傾廩與談天

邂逅聞弦即賞音
况逢清境夜携琴
一罇相遇煙霞

外不廢江湖萬里心

次韻彭青老詠雪三絕句

雪窓未怕筆頭乾能寫春江三峽寒
笑指漁翁臥蓬裏不知流下釣魚竿

天公剪水散花林試比江梅色淺深
梁苑詞人能賦詠終篇不作苦寒吟

莫倚雪車詩句好池臺草木待春風
稍晴更上高樓望要看餘霞散晚紅

贈曦上人二絕句

學詩真似學參禪水在瓶中月在天
夜半鳴鐘驚大

衆斬新得句忽成篇

寺倚村南澗水開終年行脚看山回
盧仝欲洗塵埃渴入寺却愁曦未來

次韻劉惠直梅花二絕句

雪壓寒梢玉作容嶺頭相見又東風
人間欲問春消息半在竹橋溪影中

吳姬玉面如相識寒立山隈欲下來
先與江南作春色一枝傾倒向人開

夜郎歸日荅葛令惠詩

七載投荒萬里餘交游半作曉星疎
門前梅柳換新

葉忽得故人相問書

南嶽張道人見訪言論疊疊若有所自非鹿
鹿然者也撫其語作詩贈之三十年相見爲
汝掀髯一笑考其所目也

喚起赤龍耕玉池池邊龍虎自交馳周天一轂三十
輻十二樓前看雪飛

次韻李宜仲以詩寄龍涎

愁眉此日爲君開誰道嶺南無鴈回邂逅江南逢驛
使龍涎風味敵官梅

鵲噪柴門曉未開香風撩我夢驚回恨無好句酬高
詠喚起謫仙蘇與梅

謗投山篋書猶在力挽九關天可回胡不比歸陳苦
語莫貪南海戀甜梅

戲向文剛生子

平生只欠掌中珠天與此兒聊慰渠郎罷新來着綵
服要令啼戲覓銀魚

和曾英伯

江東渭北關心事樽酒論文更不疑馬上皺眉應得
句詩筒聊復寄微之

雷秀才嘗學詩於呂居仁能談江西宗派中

事輒次居仁韻二絕贈行

逐客歸尋溪上居釣竿猶掛洞庭湖忽逢雷子談詩
派傳法傳衣共一途

聞有牙籤萬卷藏槐花應笑舉人忙向來閱士知多
少他日昂霄見此郎

周秀才取古物作十絕句見惠如豐城臨平
鼓之類作一絕句題其後

衆寶沈埋萬古悲斬新拈出更題詩臨平石鼓無人
識誰把銅魚作鼓椎

贈寫真胡生二絕句

欲貌盧溪真面目非儒非佛亦非仙莫將跼確盧行
者喚作騎驢孟浩然

誤着儒衣到骨窮兒童拍手笑衰翁釣魚艇子今無
恙置我五湖煙雨中

八月十四夜彥和置酒待月遇雨

君方置酒待月明便有微雲薄太清雨罷陰雲嘗解
駁且教霖雨慰蒼生

玉宇初涼江練靜夜深風雨更淒清從教洗出峯頭
路雲破星翻月自生

坐待涼蟾雨欲傾一樽相對晚風清甲兵正要天河

洗秉燭無妨對麴生

觀競渡次壁間絕句

共坐南窓待月明雲間忽見大江橫釣魚船上誰家
笛吹出騷人萬古情

紅旗畫鼓照江明兩岸爭看萬目橫奪得錦標誰助
喜呼聲動地見真情

昔年買酒論文地回鴈峯前鴈陣橫白首相逢夜郎
道不因生死見交情

心如止水貯空明還似虛舟盡日橫妙語忽然穿月
脇筆端那有浴間情

謝子發惠茶

打門誰送雙圓璧驚覺茅簷晝日眠便覺清風生兩
腋夢魂飛到月輪邊

謁僧惠端不遇

僧扉深倚碧巖隈何處看雲久未回日暮鳴鐘應不
語嗔人馬跡泥蒼苔

和劉端禮時端禮失解

槐花又是一番黃天馬飄飄不可韉但得頃田耕負
郭肯將斗酒博西涼

白面書生鐵作肝風雨未動劔長閑何時去斬匈奴

首直取西涼盡處山

才如天馬豈能羈爭看雲霓筆下飛
齷齪不須談細務健毫留對冕旒揮

國材姪送林擒

嫩紅輕拂女兒臉淺綠深堆瑪瑙盤
草木若能成好字來年早寄一枝看

贈清首座

上堂何事更論量還我珠來本自光
未識飛猿嶺頭峻兩回掀倒夾山牀

和裴主簿桃花

近水殘桃不忍看似臨清鏡惜紅顏
騎驢主簿吟詩瘦應禿千毫筆管班

秋蘭寄知縣陳邦直

昨夜西風茁紫芽不應獨著野人家
安仁未倦栽桃李添此清香一種花

和荅邦直二首

惠愛如蘭正吐芽芳風吹落幾千家
明年催直金鑾殿龍口飄香看百花

系出拾遺揚馬後清詞麗句復名家
豈惟草木遭題品大筆行當判五花

美胡烈臣晚年生子

老蚌生珠喜可涯窮閭得寶亦堪誇如今七歲誦千字他日端能讀五車

和彭養正陳令尹

氣壓秋園百草芽風流宜在令君家但傾綠蟻伴清客莫羨黃金刻鮮花

和劉元弼見招

玉壺沽酒挈青絲及取春風花發時便把一罇留客醉莫教紅雨洗殘枝

贈相士

富貴本非吾輩事老來寧復問窮通餘齡幾許君知否願作昇平一老翁

問訊王道之病

居士病從何處起我今往問與誰俱室中三萬二千座更許盧溪下語無

贈宜春筆工

宜城一變宣城樣入手便如錐畫沙但喜中書頭未秃不妨詩老夢生花

步芳園

密栽桃李礙車輪柳下風微不動塵已辯尋春蠟雙

履飛花滿地草如茵

湖頭觀桃李四絕句

路轉煙村萬木春
村深疑有避秦人
山農出谷驚相問
不信邊頭有戰塵

朝騎一馬暮還歸
盡日花間覓句遲
黃四娘家誰敢道
古來惟有少陵詩

城裏池臺俗儉窮
却來城外探東風
曲欄幽檻趣不遠
春在郊原浩蕩中

春入千林煙雨中
桃花李花能白紅
一時草木披錦繡
十里吹香墜晚風

茉莉花三絕句

纖雲捲盡日西流
人在瑤池宴未休
玉母欲歸香滿路
曉風吹下玉搔頭

火雲燒野葉聲乾
歷眼誰知玉蕊寒
疑是羣仙來下降
夜深時聽珮珊珊

逆鼻清香小不分
冰肌一洗瘴江昏
嶺頭未負春消息
恐是梅花欲返魂

卷之四

水

